

671.3403
078
18

新修南陽縣志

新修南陽縣志

PDG

新修南陽縣志目錄

卷首輿圖

縣境全圖

山川圖

城關圖

縣署圖

學宮圖

學堂圖

卷一沿革表

藩封表附

卷二疆域志

星野

山川

古蹟

風俗

物產

卷三建置志

城池

官署

壇廟

鄉保

集鎮

卷四職官表

宦蹟附

卷五田賦志

戶口

田畝

錢糧

鹽法

倉儲

卷六學校志

貢舉表

世職表

封贈表附

卷七祠祀志

名宦

鄉賢

忠義孝悌

節孝

卷八兵防志

歷代兵事

屯衛

驛鋪

保甲

卷九溝渠志 陂堰

卷十藝文志 金石附

卷十一人物志 列女附

卷十二雜記 祥異 流寓 仙釋 寺觀

南陽縣志卷十一

人物

下

隋

韓則

杜頽

程元

劉斌

韓則南陽人爲延州刺史甚有惠政

隋書高構傳

杜頽南陽人隋文帝詔頽等於秘書內補續殘缺爲正副二本藏於宮中其餘以實秘書內外之閣凡三萬餘

卷

隋書經籍志

程元南陽人師事王通於絳退謂薛收曰夫子載造彝

倫一匡皇極微夫子吾其失道左見矣因與董常等備聞六經之義通嘗稱元仁勝智又曰聞過而有喜色程

元能之

文中子
中說

劉斌南陽人之遴孫斌頗有詞藻嘗與虞世南孔德紹劉孝孫等結文會官至信都司功書佐竇建德署爲中書舍人建德敗復爲劉黑闥中書侍郎與黑闥亡歸突

厥不知所終

隋書文苑傳

唐

韓思彥

見祠祀

韓琬

張有略

張茂之

張曉

見祠祀

張巡

見祠祀

韓仲卿

見祠祀

張建封

子情

韓翊

樊宗師

韓愈

見祠祀

張正甫

子毅夫孫

張登

景審

張賁

韓琬字茂貞賀州司馬思彥子也喜交酒徒落魄少崖檢有姻勸舉茂才名動里中刺史行鄉飲餞之主人揚解曰孝於家忠於國今始充賦請行無算爵儒林榮之擢第又舉文藝優長賢良方正連中拜監察御史景雲

初上言國安危在於政政以法暫安焉必危以德始不
便焉終治夫法者智也德者道也智權宜也道可以久
大也故以智治國國之賊不以智治國國之福貞觀永
徽之間農不勸而耕者眾法施而犯者寡俗不偷薄器
不汙窳吏貪者士恥同列忠正清白者比肩而立罰雖
輕而不犯賞雖薄而勸位尊不倨家富不奢學校不闕
而勤道佛不懲而戒土木質厚稗販弗蚩其故奈何雜
以皇道也自茲以來任巧智斥謬諛趨勢者進守道者
退諧附者無黜剝之憂正直者有後時之嘆人趨家競
風俗淪替其故奈何行以霸道也貞觀永徽之天下亦

今日天下淳薄相反由治則然夫巧者知忠孝爲立身之階仁義爲百行之本託以求進口是而心非言同而意乖陛下安能盡察哉貪冒者爲能清貞者爲孤浮沉者爲黜剛正者爲愚位下而驕家貧而奢歲月漸積不救其弊何由變浮之淳哉不務省事而務捉搦夫捉搦者法也法設而滋章滋章則盜賊多矣法而益國設之可也比法令數改或行未見益止未知損譬弈者一棋爲善而復之者愈善故曰設法不如息事事息則巧不生聖人防亂未然天下何由不治哉永淳時雍邱令尹元貞坐婦女治道免官今婦女役常不知怪調露時

河內尉劉憲父喪人有請其員者有司以爲名教不取
今詔爲見機太宗朝司農以市木種倍價抵罪大理孫
伏伽言官木種貴故百姓者賤臣見司農識大體未聞
其過太宗曰善今和市專刻剝名爲和而實奪之往者
學生佐史里正每一員闕擬者十人今當選者亡匿以
免往選司從容有禮今如仇敵賈販往官將代儲什物
俟其至今交罷執符紛競校在亡往商賈出入萬里今
市井至失業往家藏鏹積粟相夸今匿貲示羸以相尙
往夷狄款關今軍屯積年往召募人賈其勇今差勸闔
宗逃亡往倉儲盈衍今所在空虛夫流亡之人非愛羈

旅忘桑梓也歛重役巫家產已空鄰伍率連遂爲游人窮詐而犯禁救死而抵刑夫亂繩已結急引之則不可解今刻薄吏能結者也舉劾吏能引者也則解者不見其人願取奇材卓行者量能授官又言仕路太廣故棄農商而趨之一夫耕一婦蠶衣食百人欲儲蓄有餘安可得乎書入不報出監河北軍兼按察使先天中賦絹非時於是穀賤縑益貴丁別二縑人多徙亡琬曰御史乃耳目官知而不言尙何賴又上言須報則弊已甚移檄罷督乃聞詔可開元中遷殿中侍御史坐事貶官卒

琬著南征記十卷

新舊唐書韓思
彥傳藝文志

張有略字維之南陽人有德而警既卒李華爲文諫之
李華德先生諫或問曰德先生奚氏余曰南陽張姓有
略其名維之其字也或曰與古誰倫可遜七十子乎余
曰七十子或賢或恒人方於賢原思宓不齊比也或曰
大哉余曰七十子親聖人之道者也維之追聖人之道
者七十子得聖人疆畛之際維之得聖人衣冠之潤向
使獲親聖人則麟差耕雍也或曰何咎而警余曰聖賢
偕時春秋之亂冉耕惡疾左邱明卜商皆警聖如夫子
失司冠飢於陳蔡忠如萇弘謀尊王室而戮死君子道
消故仁賢窮維之鄰道昌黎韓拯亦以德聞與維之同
病不幸二子不以病爲僉不喪中明者也或曰夫如是
得無誅之余諫之曰神胡病後之人而
奪先生噫嘻哀夫人德甫余將嚙兄

張茂之字季豐南陽人爲元德秀高弟子

新唐書元德秀傳

張建封字本立鄧州南陽人客隱兗州祖七範淇州南
昌令父玠少任俠安祿山反使李延偉魯徇山東魯郡

太守韓擇木迎館之玠率豪傑段終等集兵將斬以徇
擇木不許唯司兵參軍張孚助其謀乃殺廷偉并其黨
以聞擇木孚皆受賞而玠去之江南不自言功建封少
喜文章能辨論慷慨尙氣自許以功名顯李光弼鎮河
南盜起蘇常閒殘掠鄉縣代宗詔中人馬日新與光弼
麾下皆討建封見中人請前喻賊可不須戰因到賊屯
開闢禍福一日降數千人縱還田里由是知名湖南觀
察使韋之晉辟署參謀授左清道兵曹參軍不樂職輒
去令狐彰節度出毫奏置幕府彰不朝覲建封非之往
見轉運使劉晏晏奏試文且評事使筦漕務歲餘罷時

馬燧爲三城鎮邊使雅知之表爲判官擢監察御史燧
伐李靈耀軍中事多所諷訪從鎮河東授侍御史卽表
其能於朝楊炎將任以要職盧杞不喜出爲岳州刺史
李希烈旣破梁崇義跋扈不臣壽州刺史崔昭與相聞
德宗召宰相選代昭者杞倉卒不暇取它吏卽白用建
封希烈數敗王師張甚遂僭卽天子位淮南節度使陳
少游陰附之希烈遣將楊豐齎僞赦二畀建封少游豐
至建封縛致軍中會中人來對之斬其首因送僞書於
行在少游聞之志汗不自處建封乃劾其附賊狀帝方
蒙難不暇治也希烈又署杜少誠爲淮南節度使約破

壽州以趨江都建封壁霍邱秋柵拒之賊不能東遷團練使帝還自梁少游卒憂死進兼御史大夫濠壽廬觀察使是時四方尚多故乃繕陴隍益治兵四鄙附悅希烈使票帥悍卒來戰建封皆沮屺之賊平進封階又任一子正員官貞元四年拜御史大夫徐泗濠節度使始李洧以徐降洧卒高承宗獨孤華代之地迫於寇常困蹙不支於是李泌建言東南漕自淮達諸汴徐之埭橋爲江淮計日今徐州刺史高明應甚少脫爲李納所并以榷餉路是失江淮也請以建封代之益與濠泗二州夫徐地重而兵勁若帥賢卽淄青震矣帝曰善由是

徐復爲雄鎮久之檢校尙書右僕射十三年來朝帝不待日召見延英殿詔會朝赴大夫班以示殊寵建封賦朝天行以獻帝着遇異等賜名馬珍具是時宦者主宮市置數十百人閱物屋左謂之白望無詔文驗覈但稱宮市則莫敢誰何大率與直十不償一又邀闥闈所奉及腳傭至有重荷趨肆而徒返者有農賣一驢薪宦人以數尺帛易之又取他費且驅驢入宮而農納薪辭帛欲急去不許恚曰惟有死耳遂擊宦者有司執之以聞帝黜宦人賜農帛十匹然宮市不廢也諫臣交章列上不納故建封請開爲帝言之帝頗順聽會詔書蠲民逋

賦帝問何如答曰殘逋積負決無可歛雖蠲除之百姓
尙無所益又陳河東節度使李說華州刺史盧徵皆病
不能事左右得以爲姦右金吾大將軍李翰好刺細事
規寵人疾惡之帝悉嘉可未幾制詔官師過從人情之
常自今金吾勿以聞上已賜晏曲江特詔與宰相同榻
食其還鎮帝賦詩以餞雖馬燧渾瑊劉元佐李抱真等
勳寵卓越未有以詩餞者帝又使左右以所持鞭賜之
曰卿節誼歲寒弗渝故用此爲况建封又賦詩以自警
勵十六年以病求代詔韋夏卿代之未至而建封卒年
六十六册贈司徒治徐凡十年躬於所事一軍大治善

容人過至健黠亦未嘗曲法假之其言忠義感激故下
皆畏悅性樂士賢不肖游其門者禮必均故其往如歸
許孟容韓愈皆奏署幕府有集二百三十篇傳於時子
愔

愔始以蔭補虢州參軍事建封卒府佐鄭通誠者攝留
事畏其軍亂因浙西戍兵過徐謀引以爲援舉軍怒斧
庫取兵環府大譟殺通誠及大將數人乃表於朝請愔
爲留後假旄節帝不許披濠泗隸淮南詔杜佑討徐亂
泗州刺史張仝以兵攻埭橋與徐軍戰仝大敗帝未有
以制乃授愔右驍衛將軍徐州刺史知留後以仝爲泗

州留後杜兼爲濠州留後俄進愔武甯軍節度使元和
初以疾求代召爲工部尙書以王紹節度武甯還濠泗
隸徐徐人喜遂不敢亂而愔得行未逾境卒愔治徐七
年其政稱治贈尙書右僕射

新唐書本傳
舊唐書本傳

韓翃字君平南陽人與盧綸吉中孚錢起司空曙苗發
崔峒耿諱夏侯審李端皆能詩齊名號大厯十才子侯
希逸表佐淄青幕府府罷十年不出李勉在宣武復辟
之俄以駕部郎中知制誥時有兩韓翃其一爲刺史宰
相請孰與德宗曰與詩人韓翃終中書舍人有詩集五

卷

金唐詩傳
萬姓統譜

南陽樊氏

樊宗師字紹述南陽人祖詠大理評事父澤帥襄陽江

陵官至右僕射卒贈司空謚成自祖及宗師三世皆以

上第進宗師始為國子主簿元和三年擢軍謀宏遠科

授著作佐郎歷金部郎中絳州刺史徙絳州治有績進

諫議大夫未拜卒始宗師家饒於財身居長嫡悉推與

諸弟妻子告不給宗師怡然處之無有難色窮究經史

章通句解至於陰陽軍法聲律悉皆研究原本又善為

文章詞句刻深獨追古作為徒不顧世俗輕重著春秋

傳魁紀公樊子凡百餘篇昌黎集 新唐書 府志

韓愈南陽樊紹述

墓誌銘樊紹述既卒且葬愈將銘之從其家求書得書

號魁紀公者三十卷曰樊子者又三十卷春秋集傳上

五卷表牋策狀書序傳記紀誌說論今文讚銘凡二百
九十一篇道路所遇及器物門里雜銘二百二十賦十
詩七百一十九日多矣哉古未嘗有也然而必出入仁義其富
不襲蹈前人一言一句又何其難也必出入仁義其富
若生蓄萬物必具海含地負放恣橫從無所統紀然而
不煩於繩削而自合也嗚呼紹述於斯術其可謂至於
斯極者矣生而其家貴富長而不有其藏一錢妻子告
不足顧且笑曰我道蓋是也皆應曰然無不意滿嘗以
金部郎中告哀南方還言某師不治罷之以此出爲綿
州刺史一年徵拜左司郎中又出刺絳州綿絳之人至
今皆曰於我有德以爲諫議大夫命且下遂病以卒年
若干紹述諱宗師父諱澤嘗帥襄陽江陵官至右僕射
贈某官祖某官諱泳自祖及紹述三世皆以軍謀堪將
帥策上第以進紹述無所不學於辭於聲天得也在眾
若無能者嘗與觀樂問曰何如曰後當然已而果然銘
曰惟古於詞必已出降而不能乃剽賊後皆指前公相
襲從漢迄今用一律寥寥久矣莫覺屬神祖聖伏道絕
塞旣極乃通蚤紹述文從字順各識職有欲求之此其
蹟

張正甫字踐方南陽人曾祖大禮坊州刺史祖紹貞尙書右丞父泚蘇州司馬正甫登進士第從樊澤爲襄陽從事于頔代澤辟留正甫正甫堅辭遂誣奏貶彬州長史後由雍州徵拜殿中侍御史遷戶部員外郎轉司封員外郎兼侍御史知雜事遷戶部郎中改河南尹由尙書右丞爲同州刺史入拜左散騎常侍集賢殿學士判院事轉工部尙書五年檢校兵部尙書太子詹事明年以吏部尙書致仕正甫仁而端亮泄官清強居外任所至稱理太和八年九月卒年八十三累贈太師子毅夫毅夫登進士第初正甫兄式大厯中進士登第繼之以

正甫式子元夫傑夫徵夫又相次登第太和中文章之
盛世共稱之元夫太和初兵部郎中知制誥遷中書舍
人出爲汝州刺史毅夫位至戶部侍郎宏文館學士判
院事諸萃從登第者數人而毅夫子禕最知名

舊唐書

禕字冠章釋褐汴州從事戶部判官入爲藍田尉集賢
校理趙隱鎮浙西劉鄩鎮淮南皆辟爲賓佐入爲監察
御史遷左補闕乾符中召入翰林爲學士累官至中書
舍人黃巢犯京師從僖宗幸蜀拜工部侍郎判戶部事
奉使江淮還爲當塗者不協改太子賓客左散騎常侍
轉吏部侍郎僖宗判兵部尙書從昭宗在華爲韓建所

搆貶衡州司馬昭宗還京徵拜禮部尙書太常卿充禮儀使遷兵部尙書禕苦心爲文老而益壯爲刑部時劉鄴子覃當巢寇時避禍於金吾將軍張直方之第被害僖宗還京而惡覃者以託附逆黨死不以義下三司詳罪禕上章申理言覃父子併命於賊廷豈附逆耶其家竟獲洗雪覃亦贈官其行義始終皆如此類

舊唐書本傳

張登南陽人貞元時江南士掾滿歲計相表爲殿中侍御史董賦江南俄拜漳州刺史范陽盧主簿道漳以適越越人悅之稅車休徒三旬之間然後敕行李之命時日南至登與客僚會別於郡齋醴酒卜夜酒酣咸請詩

之由是探韻而賦賦不出志感時傷遠悽然動人有集
六卷

景審南陽人長慶中有善書名亦工詩題所書黃庭經
後云金粉爲書重莫過黃庭舊許右軍多請看今日酬
恩德何似當年爲愛鵝張爲作主客圖審預焉

張賁字潤卿南陽人登大中進士第唐末爲廣文博士
嘗隱茅山後寓吳中與皮陸遊詩酒相唱和焉

全唐詩
小傳

五代

朱葆光

朱葆光南陽人朱温篡唐葆光與唐舊臣顏蕘李濤輩

挈家南渡寓潭州每正旦冬至必序立南嶽祠前北望
號慟殆二十年後濤北歸葆光遂家於衡子昂自有傳
新五代
史本傳

宋

張澹

朱昂

滕宗諒

王襄

張澹字成文其先南陽人徙家河南澹幼而好學有才
藻晉開運初登進士第宰相桑維翰器之妻以女解褐
校書郎直昭文館再遷祕書郎充鹽鐵推官歷左拾遺
禮部員外郎並充史館修撰出爲洛陽令秩滿授吏部

員外復充史館修撰周恭帝初拜右司員外郎知制誥
建隆二年加祠部郎中會祕書郎張去華上書自薦有
文藝願與澹及祠部員外郎知制誥盧多遜殿中侍御
史師頌並試覈定優劣太祖令並試於講武殿澹所對
不應策問責授左司員外郎未幾通判泰州兼海陵鹽
監副使蜀平通判梓州復拜祠部郎中開寶初就轉倉
部郎中四年冬以本官知制誥六年會李昉責授盧多
遜使江南內署闕學士太祖令澹權直學士院七年長
春節攝殿中監祭酒命賜金紫六月權點檢三司事不
逾旬疽發背卒年五十六太祖聞其無子甚愍之命中

使護葬於洛陽澹美風儀善談論歷官釐務所至皆治
初與詞臣校藝黜居郎署頗怏怏晚年附會盧多遜方
再獲進用淳化中太宗論及文士曰澹典書命而試以
策非其所長此蓋陶穀高錫黨張去華以沮澹爾若使
穀輩出其不意而遽試之豈有不失律者邪

宋史本傳

朱昂南陽人父葆光已有傳昂讀書至萬卷官翰林學
士澹於榮利進退有禮有文集三十卷

滕宗諒字子京河南南陽人

府志

與范仲淹同年舉進士

其後仲淹稱其才乃以泰州軍事推官召試學士院改
大理寺丞知當塗邵武二縣遷殿中丞代還會禁中火

詔劾火所從起宗諒與祕書丞劉越皆上疏諫宗諒曰
伏見掖庭遺燼延熾宮闈雖沿人事實繫天時詔書頓
下引咎滌瑕中外莫不感動然而詔獄未釋鞠訊尙嚴
恐違上天垂戒之意累兩宮好生之德且婦人柔弱筆
楚之下何求不可萬一懷冤足累和氣祥符中宮掖火
先帝嘗索其類寘之法矣若防患以刑而止豈復有今
日之虞哉況變警之來近在禁掖誠願修政以禳之思
患以防之凡逮繫者特從原免庶災變可銷而福祥來
格也疏奏仁宗爲罷詔獄時章獻太后猶臨朝宗諒言
國家以火德王天下火失其性由政失其本因請太后

還政而越亦上疏太后崩擢嘗言還政者越已卒贈左
司諫而除宗諒左正言遷左司諫坐言宮禁事不實降
尚書祠部員外郎知信州與范諷雅相善及諷貶宗諒
降監池州酒久之通判江甯府徙知湖州元昊反除刑
部員外郎直集賢院知涇州葛懷敏軍敗於定州諸郡
震恐宗諒顧城中兵少乃集農民數千戎服乘城又募
勇敢諜知寇遠近及其形勢檄報旁郡使爲備會范仲
淹自環慶引蕃漢兵來援時天陰晦十餘日人情憂沮
宗諒乃大設牛酒迎犒士卒又籍定州戰沒者於佛寺
祭醑之厚撫其孥使各得所於是邊民稍安仲淹薦以

自代擢天章閣待制徙慶州上言朝廷既授范仲淹韓琦四路馬步軍都督管經略安撫招討使而諸路亦帶招討稱號非所宜詔罷之御史梁堅劾奏宗諒前在涇州費公錢十六萬貫及遣中使檢視乃始至部日以故事犒資諸部屬羌又聞以饋遺遊士故人宗諒恐連逮者眾因焚其籍以滅姓名仲淹時參知政事力救之止降一官知虢州御史中丞王拱辰論奏不已復徙岳州稍遷蘇州卒宗諒尙氣倜儻自任好施與及卒無餘財所莅州喜建學而湖州最盛學者傾江淮間有諫疏二

十餘篇

宋史本傳

王襄初名甯鄧州南陽人擢進士第崇甯二年以軍器
監主簿言事稱旨擢庫部員外郎改光祿少卿出察訪
陝西還顯謨閣待制權知開封府府事浩穰訟者株蔓
千餘人縲繫滿獄襄晝夜決遣四旬俱盡又閱月獄再
空遷龍圖閣直學士吏部侍郎出知杭州未至改海州
又改應天府徙鄆州召爲禮部尙書移兵部出知潁州
改永興軍蒲城妖賊王甯適同姓名請更名宓爲左司
諫石公弼所劾徙汝州俄奪學士提舉南京鴻慶宮大
觀三年以集賢殿修撰知潭州改兵部侍郎使高麗還
對稱旨詔賜名襄厯工部吏部尙書拜同知樞密院事

坐薦引近侍以延康殿學士罷知亳州又坐交通郭天
信落職提舉嵩山崇福宮久之起知郢州復學士秩尋
加資政殿學士徙知淮甯府以言事忤王黼復提舉崇
福宮宣和六年起爲河南尹金人再入出爲西道都總
管張杲副之高宗開大元帥府襄以所部兵會于虞城
縣卽位命襄知河南府襄初與趙野分總西北道諸軍
金人圍京師徵兵入援二人故迂道宿留至是降甯遠
軍節度副使永州安置卒

宋史本傳

元

暢師文

父訥

白景亮

智受益

李廷瑞 性烈

暢師文字純甫南陽人祖淵贈中順大夫上騎都尉魏郡伯父訥有詩名注地理指掌圖仕爲汴幕官贈大中大夫上輕車都尉魏郡侯師文幼警悟家貧無書手錄口誦過目輒不忘弱冠謁許衡與衡門人姚燧高凝皆相友善至元五年陳時政十六策丞相安圖奇其才辟爲右三部令史十二年丞相巴延攻宋選爲掾屬從定江南及歸舟中惟載書籍而已十三年編平宋事蹟上之十四年除東川行樞密院都事盡心贊畫多所裨益十六年安西王承制改四川北道宣慰司經歷尋除乘

直郎潼川路治中修府舍發地得銀五十錠同僚分師
文十錠不受用以修廟學及傳舍餘作酒器給公用十
九年承制改同知保甯路事治尙平簡反側以安二十
二年僉西蜀四川道提刑按察司事二十三年拜監察
御史糾劾不避權貴上所纂農桑輯要書二十四年遷
陝西漢中道巡行勸農副使置義倉教民種藝法二十
八年改僉陝西漢中道提刑按察司事時更提刑按察
司爲肅政廉訪司就僉本道肅政廉訪司事黜姦舉才
咸服其公三十一年徙山南道松滋枝江有水患歲發
民防水往返數百里苦於供給師文以江水安流悉罷

其役駙馬伊都呼家人姑勢不法細文治其甚惡者流

之大德二年改山東道入爲國子司業七年出爲陝西

行中書省理問官決滯獄不少阿徇頃之以疾家居九

年擢陝西漢中道肅政廉訪副使又以疾不赴十年起

太常少卿轉翰林侍讀學士朝請大夫知制誥同修國

史至大元年修成宗實錄賜鈔一百錠不受時制作多

出其手二年加少中大夫三年請補外任除太平路總

管時大旱師文捐俸致禱不數日澍雨大降遂爲豐年

當塗人坐殺牛祈雨囚繫者六十餘人師文憫而出之

公田米積之盈屋口我家幾人能盡食此乎呼貧士及

細民恣其取去廉訪分司官前後至者必先謁師文稱
爲先生師文在任未久境內晏然皇慶二年復召爲翰
林侍讀學士中奉大夫知制誥同修國史奉旨撰王勃
成道記序等文賜銀二錠不受除燕南河北道肅政廉
訪使以病去官延祐元年徵拜翰林學士資德大夫行
至河南復以病歸襄陽四年秋八月考河南鄉試歸次
襄縣卒于傳舍年七十一葬襄陽峴山泰定三年贈資
政大夫河南江北等處行中書省左丞上護軍追封魏
郡公諡文肅後至元八年加贈推忠守正亮節功臣三
子長曰篤仕至大中大興江東道肅政廉訪副使

元史本傳

白景亮字明甫南陽人明法律善書算由征東行省譯
史有勞超遷南恩知州升沔陽府尹奏最于朝特授衢
州路總管先是爲郡者於民間徭役不盡校田畝以爲
則吏得並緣高下其手富民或優有餘力而貧弱不能
勝者多至破產失業景亮深知其弊乃始覈驗田畝以
均之役之輕重一視田之多寡大小家各使得宜咸便
安之由是民不勞而事易集他郡邑皆取以爲法郡學
之政久弛從祀諸賢無塑像諸生無廩饌祭服樂器有
缺景亮皆爲備之儒風大振搢紳稱頌焉景亮性廉介
勤苦自奉甚薄妻尤儉約惟以脫粟對飯而已部使者

嘗上其事特詔褒美賜以宮錦改授台州路總管卒于

官

元史本傳

智受益南陽人以善書負時望至元中擢荆湖行省都事征交趾轉行省郎中計度餽餉厯遷宣慰副使練習事物吏不能隱及爲潭兵總管郡人大悅豪縱者皆遠

避庭無留事賜金虎符進兩浙運使卒

圖書集成引浙江通志

李廷瑞怯烈歹

國語解作齊哩克岱

皆南陽人居喪有至行廬墓

次負土爲墳有司請表異之

元史孝友傳

明

郭雲

鐵鉞

見祠祀

唐俊 見祠祀

鄭剛 見祠祀

劉涪

李震

熊紀

見祠祀
孫明誠附

史彪

見祠祀

王鴻儒

見祠祀

張景純

張采

見祠祀

謝在

郭監

王鴻漸

見祠祀

張儒

王汝魯

見祠祀
子應修附

朱誥

方九功

子適
孫廣德

王光祖

葉文選

葉珠

蘇我民

包起鳳

王明物 見祠祀

張鳳翔 見祠祀

周 謙 見祠祀

錢勳吾 見祠祀

越效忠

王士俊

徐光宗

馬應麟

孫光澤

郭雲南陽人 明史 鈍翁續稿 中州人物考同 性沈

毅寡言笑 舊志 武勇有謀略 鈍翁續稿 身長八尺餘狀貌魁偉

元季聚 明史 鄉人爲義兵 鈍翁續稿 保裕州白泉寨 明史 舊志作泉白

山 賊不敢犯 鈍翁續稿 累官湖廣行省平章政事元主北奔

河南郡縣皆降明雲獨堅守裕州 鈍翁續稿 累論不下 舊志 大

...續稿久之

孤援絕中州人軍敗被執鈍翁續稿大將軍呵之跪雲梯

且罵且求死鈍翁續稿大將軍壯之繫送京師明史既見

太祖奇其貌明史命釋縛值方闕漢書問之曰識字

子對曰識因以書授之使讀鈍翁續稿雲誦其書甚習帝大

喜厚加賞賜用為溧水知縣明史民皆稱之鈍翁續稿帝益以

為賢特擢明史宣武將軍舊志南陽衛指揮僉事使還故鄉

收故部曲就戍其地明史築城建衛撫綏羣黎民咸樂業

數年卒明史上悼惜親製文祭之中州人物考長子弘年甫

十三帝為下制曰明史昔之君天下者尤必褒崇忠義故

漢高祖封雍齒而斬丁公傳於史冊以爲美談郭雲出

自田閒倡率義旅保障鄉曲

鈍翁續稿

寇隘累年竭心屏事

王師北伐人神響應而雲

明史

集一旅之眾

鈍翁續稿

數戰不

屈勢窮援絕終無異志朕嘉其節概試之有司則閭閻

頌德俾鎮故鄉則軍民樂業雖無汗馬之勳倒戈之效

治績克著忠義凜然子弘可入開國功臣列授宣武將

軍乘熊衛親軍指揮僉事世襲

明史

爾職爾弘母狎小人

毋累武事用承乃父之緒

南陽人續稿

厥惟懋哉

鈍翁續稿

劉道南揚人洪武末爲原武尉尋用主簿爲世子師尋

官於朝補右長史以直輔主簿遷南陽府經歷而精治

啓徵進戒王用其言修省枯枝復榮王旌其槐曰據忠
致仕十餘年而卒年九十有七

明史

李震南陽人父謙都督僉事震襲指揮使正統九年從
征兀良哈有功進都指揮僉事已從王驥平麓川進同
知景帝卽位充貴州右參將擊苗於偏橋敗之景泰二
年從王來征韋同烈破鎖兒流源諸砦斬千六百人
共克香爐山獲同烈進都指揮使守靖州尋坐罪徵還
方瑛討苗乞震隨軍詔許立功贖已從瑛大破天堂諸
苗命仍充左參將瑛平銅鼓諸賊震亦進武岡克牛欄
等五十四砦斬獲多進都督僉事天順三年復從瑛平

千把豬瑛卒卽以震充總兵官代鎮貴州湖廣初麻城人李添保以逋賦逃入苗中僞稱唐太宗後眾萬餘僭王建元武烈以故賊魁蒙能子聰爲帥剽掠遠近震進擊大破之添保遁入貴州鬼池諸苗中復誘羣苗出掠震擒之送京師尋破西堡苗五年春勦城步徭獞攻橫水城溪莫宜中平諸砦皆破之長驅至廣西西延會總兵官過興軍克十八團諸徭前後俘斬數千人其冬命震專鎮湖廣以李安充副總兵守貴州明年夏率師由錦田江華抵雲川桂嶺橫江諸砦破徭俘斬二千八百餘人七年冬苗據赤谿瀘洞長官司震與安分道進斬

賊渠飛天侯等破砦二百遂復長官司進都督同知明年冬廣西徭劫湖南夜入桂陽州大掠而去震遣兵追擊連敗之俘斬千六百餘人成化元年廷議以貴州黎平諸府密邇湖廣五開諸衛非一大將總領不可乃復命震兼鎮貴州未幾獲賊首蟲蝦荆襄賊劉千斤石和尚爲亂震進討賊屢敗乘勝追及梅溪賊巢官軍不利都指揮以下死者三十八人有詔切責會白圭等大軍至震自南漳進兵合擊大破之賊遂平進右都督時武岡沅靖銅鼓五開苗復蠡起而貴州亦告警震言貴州終難遙制請專鎮湖廣許之乃還兵由銅鼓天柱分四

道進連破賊直抵清水江因苗爲導深入賊境兩月開
破巢八百焚廬舍萬三千斬獲二千三百而廣西猺劫

桂陽者亦擊斬三千八百有奇當是時震威名著西南

苗獠聞風畏懾呼爲金牌李

今縣南有金牌李莊

七年與項忠討

李鬍子招撫流民九十萬人荆襄遂定十一年苗復犯

武岡靖州湖湘大擾震與巡撫劉敷等

湯文正公史稿作十二年與右

副都御史劉斌

分五道進破六百二十餘砦俘斬八千五百餘

人獲賊孥萬計論功封興甯伯時武靖侯趙輔甯晉伯

劉聚皆以功封論者多訾議之獨震功最高人無異言

參將吳經者與震有隙弟千戶綬爲汪直腹心經屬綬

譖之會直方傾項忠詞連震遂逮下獄奪爵降右都督

南京閒住

湯史稿云經弟綬掌鎮撫司從汪直刺事適有道人以黃白術得罪卽附奏震嘗匿道人

私習讖緯將謀不軌遣使逮至京震途遇直呼曰一介武夫蒙恩擔爵富貴已極更欲何爲此仇家吳經所爲願公聽察直佯若不聞下震錦衣獄

鞠訊無驗久之帝亦察其枉宥之未幾直遣校尉緝

事言震陰結守備太監覃包私通貨賂帝怒遣直赴南

京數包等罪責降包孝陵司香勒震回京直敗震訴復

爵尋卒

湯史稿云直敗震乃得復爵乞誥券不許卒後子昂不得嗣

震在湖湘久熟

知苗情善用兵一時征苗功方瑛後震爲最然貪功好

進事交結竟以是敗

明史本傳

張景純字文粹受業於太守段堅領成化丙午鄉薦凡

性命道德之旨天文地理之學無不精究曉悉著書立
言名重一時號爲豫山先生王文莊公鴻儒每歎服之
未仕而卒

洹詞 名山藏
舊志 邵寶集

謝在南陽人正德十一年舉於鄉十六年知高郵州讞
獄執法不避權貴以公帑羨餘置田八百畝補官俸士
廩之缺卒祀高郵名宦

高郵州志
舊志

郭監字守固父昇以舉人授咸甯令終苑馬寺丞監有
才器從父咸陽時滿四叛調發旁午監佐其父區畫事
皆立辦受學於雍泰泰異之以爲必貴已而竟不第

節
齋
集

張儒其上世華陰人明初籍隸南陽衛遂家南陽正德

甲戌成進士

太學碑錄

十二年知元城縣

元城縣志

元城故饒邑

民性易緩吏鮮能以治行見儒至潔已敏事振頽擊奸
元城乃知有令矣始元城祭先聖於陋祠博士弟子棲
於庫舍儒治元城二年政通而民富乃新學宮明祠事

崔鏡

又重刊宋元城先生劉因語錄以教學者

節惜陰軒叢書

諸生皆淳然興焉

洹詞

朱誥字巽甫號清泠萬厯丙戌

一作癸丑

進士知東明縣治

最調邢臺邢臺在太行之麓治西三十里瀕山多石侯
蘭賈鄉等處連數十村無井孤山前有窟可停蓄然障

捍未築每雨集水至率奔湧四放嚙田滕蕩禾稼順流
而去勢莫能遏由是民多棄田廬轉而之他者詔下車
訪民疾苦先試修城東南流珠等隄民便之乃請於知
府築孤山窰火石岡諸堰瀦水代井募近山民壯而貧
者任工作計日給粟又貸以粟使安其家而不責其息
舊蓄有熱乾柿葉千餘石并給之人人踴躍趨事不日
而堰成又周圍樹以椰榆以待耕汲及他凡艱於井者
皆堰鑿之用是前之棄田逃者率來歸嘗鑿侯蘭岡西
村井鑿深七丈石據土中阻不得出匠者難之誥爲文
禱山靈令復鑿頃石穿一孔泉湧如射須臾沒腰股觀

者羅拜咸稱神時五月旱禾賴以澆迨秋一本四五穗
民益神之知府張延廷因取誥別號名其泉曰清泠侯
蘭鄉民皆名其井曰朱公井爲文記之邢臺學舊未盡
創誥始一新之時時與諸生析理稽業發難質疑援引
故實以證時事又設義學五所使皆以朱子小學爲教
先是邑庠連科不舉歲辛卯遂舉二人誥爲治勤甚凡
可以爲民者悉殫力圖之建倉開閘築城葺署創修縣
志親歷山川備參羣史尤從來所未有任邢臺五年邢
人有召父杜母之稱後官至兵部武選司郎中卒祀邢
臺名宦

見邢臺縣志

誥善書嘗爲清泠淵字刻豐山石上大

皆方丈

見豐山石刻

明時善書者又有李崑字品山諸生能

爲顏魯公書名在誥上張中字時甫不及誥亦諸生嘗

爲冰壺詩社與內鄉李蔭輩相唱和

豫山石刻

李蔭

業詩社有冰壺非外獎其中佳客固如斯自注宛有冰壺詩社

方九功字允治性高潔博學能文舉進士萬曆乙丑知

江都縣有惠政擢吏部主事歷郎中陞太常少卿改

舊志

南京鴻臚寺卿

李蔭有送方允治之南鴻臚詩

累遷至南京吏部右侍

郎九功居官廉退貞白自守

李宗本寄懷詩有云范雲文炳卓毛玠行端嚴

雖

益顯榮而家居如寒素致仕歸築息機園談道自樂

按九

功又嘗官工部李蔭有贈方司空歸自金陵詩幾年江左任棲遲到官司空鬢未衰元武湖深傳勝覽紅陽春

盡得歸期表宣久著懷田賦高允新裁告老詩園有
息機堪自署海鷗從此不相疑自注云方有息機園著

有白下稿息機堂稿行於世年五十有二卒勅賜諭祭

有司疏請享祠鄉賢

按舊志鄉賢無九功今亦未敢擅增

子適字元順號

虛谷少傳父業文章與裕州吳阿衡齊名學者宗之稱
爲虛谷先生崇禎初以鄉試副榜第一拔入太學子廣
德字事心賦質穎敏體態綽約宛如凌波仙子七歲始
能言父適乃命於家塾讀書授以三字經句讀不待提
命節已成誦乃授之四子書其成誦亦如之又授以毛
詩其成誦亦如之適奇之問曰子何以能然也答曰前
兩年時聞塾中諸子讀是書耳之熟矣一時學者驚以

爲異號曰神童唐王府贅爲儀賓其胞妹亦爲唐王妃
廣德年弱冠天啟丁卯領河南鄉薦戊辰聯捷進士不
求仕進惟以圖史自娛凡諸子百家之書無所不讀其
爲文奧衍宏深而道德醇如也後爲南京國子監博士

卒

舊志

王光祖文莊公鴻儒兄孫也萬厯中舉於鄉官東安知

縣善詩與內鄉李襲時相倡和

王氏家譜
淅川志

葉文選字子進父恩有孝行

明胡懋葉
墓誌

曾祖芳有女爲

唐莊王如族父女又爲鄆城榮康王如葉氏有鴟者尙
衛輝文安郡主三世連姻王族號爲貴盛文選少事繼

母有孝稱與里人閻禎事教諭宋昂學益進後以貢生

官襄陽訓導立文飭行譚辭爽朗諸生餽贖悉卻弗受

有貧甚者更周之自釋縫掖爲儒官千金產因交名士

而遂罄卒官喪歸謚生扶柩行有哭失聲者

明龔仲口
葉桂軒墓

誌 宋昂

禎舉人官太康教諭有聲文選族人有珠者

字一陽嘉靖庚子舉於鄉

豐山
石刻

嘗輯府志十卷

見明史
藝文志

蘇我民字雲麓南陽人幼英敏讀書能明大義通五經

子史天啟甲子領河南鄉薦乙丑公車試第一場疾卒

於京師旅舍同榜舉人爲之歛資輿櫬歸

舊志

包起鳳字際霞南陽人天啟丁卯領河南鄉薦戊辰登

進士初授民部主事奉命餉邊皆親爲分發事竣餘金悉還公帑轉權崇文門稅益矢冰霜所羨並輸大府例應轉銓曹以不事援引移樞部時承平久禁兵多爲戚璫隱占起鳳力爲清核汰虛冒數萬人月省餉六萬餘都城多盜起鳳躬親巡緝隨遷協郎職方司事概絕請託嫌忌交作坐謫重慶檢校起鳳怡然無愠色冢宰司馬交章挽留旋復原官頒告赦令先後任職方六載每有大計輒排眾議身任之故人材兢奮朝議擬以清卿時楚寇李渡子聚眾數萬謀破全楚以窺金陵起鳳以廓清自任遂授武昌兵備至官易服輕舟入賊穴偵其

虛實旋督大兵勦之斬級萬餘楚寇悉平時流賊張獻忠降求襄陽一郡以屯其軍聲言寄家口於穀城乃入據守之分屯羣盜於四郊湖廣撫臣余應柱疏請起鳳監軍起鳳單騎入賊營諭以大義賊鷹眼難化然知其不可屈遂聽起鳳圖上方畧當事不從崇禎十二年五月獻忠復叛於穀城襄陽戒嚴起鳳登埤巡江風雨不輟因中寒濕痿痺猶扶病視事值土寇閻文簡乘亂嘯眾爲賊聲援乃輿疾歷以重兵殲克解從地方以靖尋以病告歸後起補潼關道參政建斥堠嚴守禦舉朝推爲知兵宣撫呂大器亦舉以自代值夙恙作復請歸會

流賊李自成陷南陽城遂奉親南徙建業父寢疾起鳳
扶病坐榻側兩閱月不解衣翁以誠格瘳至 國朝辛

卯歸里教授生徒數年卒

舊志 綏 寇紀略

越效忠南陽人以遊擊分防懷慶之清化鎮崇正六年
寇復陷清化效忠賈勇力戰及大寇蜂擁效忠倚敗屨
猶鎚殺數人伏劍死

懷慶志

王士俊字勳明南陽人性至孝年弱冠於崇禎丙子領
河南鄉薦辛巳流賊李自成陷城士俊舉家南徙至江
有賊乘夜劫船士俊已逃去半里許聞賊拷打其母哭
聲痛楚不忍捨命歸船視之謂賊曰我乃南陽孝廉也

今以船中細陬盡與汝無傷吾母賊既劫船中物并將士俊殺之其母與其妻皆投江死可哀也

舊志

徐光宗字靜軒南陽人父松以齒高德碩爲鄉約正凡鄉有不平事輒力爲分解必不使其訟於官鄉人德之遠近就平者日踵于庭松悉諭以大義卽命家人置酒爲其處和如此者年餘鄉人皆親遜無相爭者生子五光宗其長也光宗天性醇篤幼不好弄比長知讀書通五經弱冠游庠年二十七歲舉于鄉其後屢上春官不第或勸之就職不應惟讀書談道娛志林泉而已光宗性恬淡不希榮寵不干謁有司必邑中公事始於郡邑

長一面蓋庶幾澹臺滅明之風者矣著有豐山賦樂山園課藝若干卷藏于家惜寇亂灰燼無傳年七十餘卒

子孫奉其柩葬於夏眘鋪西徐氏祖塋之北

舊志

馬應麟字鳴鑿崇禎甲戌歲貢司訓扶溝縣捐貲葺學宮於士之貧者每賑給之訂期考課厲以等第順治初酉子兩闈售者偕出其門在扶溝於邑眾孤獨卽加以

軫恤時邑中有訟不得平者應麟聞之卽詣縣代伸其

寃時有廉善頌遷宜陽教諭士民念之鑄德教碑志其

德碑豎扶溝學舍迤西文載大梁石墨

舊志

孫光澤明末人流寇李自成犯境光澤欲以理却兵乃

正襟岸幘徒步詣賊所與之斷斷辨爭賊目笑其爲以
迂遣之光澤面赤眦裂顏髯盡張戟指詈賊不絕口賊
怒殺之家人葬其屍青華東門外墓前植盆玩小刺柏
一株以誌迄今柏高二丈枝葉蔥菁蔽日邑人共指以
爲異云按王夫之永麻實錄有南陽伯李元膺南陽人
本姓賈爲李成棟養子未審何縣附此俟考

國朝

馬應植

子驥驊

周之縉

楊國榮

羅明昇

金鍾華

王可問

史鑑明

趙一廉

徐永芝

兄永懋
宋景愈

祝復奇

子萬章

方 邀

趙象羆

喬世籠

五世孫
秦平

姜獲義

胡加律
吳一體

李芙蓉

周明德

子遐齡

李元方

馬載義
徐懷仁

張均
米文甲

張春霖

李文奇

薛 琮

見祠祀

何 昱

子敬之
周軼凡

樊士俊
軼凡

畢大典

胡恩綸

擺守德

見祠祀
李大德等附

雷 劍

秦世璽

王夢麟

曾孫元峻
元嶸

王忠尙

魏 佩

子梲

任古益

翟粵附

張存義

秦大章

黃允中

馬攀龍

陳觀保

李廣福
曾孫壽整

趙一德

宋元亮王淑詠
崔懷玉

閻掄魁

許奎

李

緯

李雨若遇文
雨若子承之

李忠道

段

琦

見祠祀
張大位等附

錢獻璋

見祠祀
黃殿甲等附

韓中選

見祠祀
子金錫附

余先強

見祠祀
熊紹孟毛學仁附

魏上豹

見祠祀
成張文燦等附
子必

郭廷藩

見祠祀

魏寅采

許克勤

黃崇禮

見祠祀

樊璟

王國用

王東巡

趙九皋

蕭長芳
呂成文

劉鉦

張勤思

李作梅

王蓮臺

祖衡

曹學彬

錢獻琛

方立志

孔鳳山李榮向
李鏡清

楊向榮

李子賢
王天倫

彭述

米鳳詔

袁舉

周克岐

族弟於京
冀清純

陳忠
高世俊

袁純

張麟

馬應禎字元符崇禎乙亥歲貢生爲人慷慨尙氣節非
公事足蹟未嘗至吏署唐端王慕其賢延爲世子傅稱
先生而不名官林縣訓導以造就人才爲己任多所成
就林縣大旱寇起知縣白抱一每事必諮焉城守肅清
林邑賴以保障闖逆犯京師應禎潔身流寓江左至

國朝順治二年旋里司李任公克溥稱其有古人風扁
其額曰耆英年八十餘卒所著有倦遊錄斗亭記讀史
災異錄藏于家三子長驪次驂季騏

舊志文
學傳

驪字頷公順治壬辰歲貢生敏給力學經史淹貫善賦
詩屬文初司訓汝陽以艱歸後補衛輝府胙城訓導告
歸居于桐河鎮之右自號桐谿逸叟闢一小園於室左
構茅屋數閒課子孫讀書其中年七十有六卒所著亦
有倦遊草若干卷

驂字赤霑號清谿少傳父業弱冠以文名順治辛卯以

歲薦

府志作
選貢

考授司李辛丑改選江西建昌知縣建昌

巖邑錢糧積逋復多

通志府志云
幾二十萬

蒞任後以康熙元年

旱災六年水災詳免萬一千四百有奇

府志作十萬
有餘通志同

又

地連武甯興國山深而險時土寇餘孽未靖聚黨劫掠
驍密詳總督張朝麟同游擊吳鎮進勦獲賊首張跑子
等勦撫兼施閱五月而賊平疏聞紀叙軍功旋以艱解

任

府志

既去二年建人刻石頌德

舊志監碑
於壽樟寺

祀名宦

府志驍

爲人耿介居官清白抵家惟有圖書數卷手輯四書詳
說講義教授生徒足迹不履公庭部檄再催起選以病
固辭不起卒年八十子聖生孫寔皆有文名

舊志

周之縉字我儒順治元年恩貢生性醇厚鄉黨稱爲長

者歷任靈寶縣訓導商城縣教諭所至興學課士以年老告歸知府王公維新延爲鄉飲正賓年七十餘卒

舊志

楊國榮字顯吾性純樸爲人直率好義明末喪亂國榮從戎行初授廣西鎮標中軍守備以平潯梧諸賊陞廣西鎮後營游擊康熙九年調南汝鎮標右營游擊抵宛

因告休

舊志

羅明昇邑人官鎮江巡江營都司以勇著順治十六年海寇犯鎮江明昇分守談家洲時暑甚褰甲不解者十餘日寇眾登洲明昇奮身陷陣遂遇害家丁趙九兒亦

死焉

江南

金鍾華字含實順治初恩貢生性淡退好學循資得選
府倅檄至鍾華稱疾不起長吏促之力求辭乃已以壽

終於家

舊志隱
逸傳

趙一廉字但鶴崇禎歲貢生志行清潔不置生產隱居

不仕學博劉文成重之稱曰高士

舊志隱
逸傳

史鑑明孝廉史臣四世孫幼穎異父洛書早歿鑑明以

不得事其父嘗飲泣事母曹氏承顏順志崇禎末流賊

陷城母完節而逝鑑明號踊欲絕其友慰之曰存史氏

一脈者惟子鑑明瞿然自此朝夕涕泣每值其母忌辰

素服舉哀五十年如一日也賊據宛時欲官鑑明鑑明

遁去里人稱爲長者

舊志

王可問邑人事親以孝聞有司以孝可問心旌之

舊志

徐永芝字鐵泉歲貢生性端慤嗜學至老不倦南陽遭

明季亂離士鮮知向學康熙中襄城李來章主講南陽

書院來章故理學名儒陳文恭公所謂中州八先生之

一也永芝長來章五歲躬詣門執弟子禮甚恭學因益

進每有記錄多所發明來章深重之稱其無毫末近世

之習

見李來章徐正軒墓表

永芝有南陽書院講學記事

略云山右禹京

張公敬齋提督中州學政試歷宛南適襄城禮山李夫子講學南陽書院公試事畢詣書院拜李夫子於師席再辭公曰先生當世名儒今爲太守青巖朱君屈主書院事是助余學政所不及也敢不拜成拜至講堂命諸

生進講諸生首述禮山夫子論語學而時習之全章疏
義首云學字須從性字體勘公躍然喜曰學非誦讀了
事窮理格物所以知性迺德修行所以復性開口便道
著性字先生之學先生之教真確有根據復命講西銘
太極二章諸生復述禮山夫子疏義公爲首肯者久之
曰學者正須於西銘認取仁字於太極認取性字仁本
性中性具仁體非是二物盡性不外盡仁盡仁實以盡
性二子之說蓋互相發明已而進歲入書院童子周其
昌林木天等十七人於前而命之曰人生德業端在蒙
發洛學薪傳盡在中州今李先生正得真諦汝輩無徒
求之言語文字間吾讀先生爲學次序一書首列立志
存心窮理集義繼以入孝出弟謹言信行懲忿窒慾遷
善改過諸論而終之以盡性至命希聖達天知先生之
學無非存誠主敬真能紹伊洛之學者矣將別語禮山
先生曰恭靖先公嘗摘取程朱許薛五子書名曰輯要
創建紫雲書院於成化十五年賜額厥後肖雲先生復
著省身錄於此天下名士多出其門予雖生不同時然
心切景慕非一日矣今復得先生守其舊廬紹明家學
不但爲公靖賢孫抑將擴義皇洛闈許薛之統而爲吾
道之傳人也予不佞願勉爲之序嗟呼世之相交者以

位以利而已張大宗師位居風憲手司文衡爲吾豫師
宗而必先枉駕書院加禮於吾禮山夫子且爲序其譜
系表其家學何
諄切乃爾耶
來章爲達天錄命永芝刪而序之其見

信如此

見禮山園集

縣志自明萬厯後失修

國初知縣李

本澤稍事纂輯而未詳

按巡撫閻興邦修志檄云府志如河南南陽荒悖失倫則縣志

可知

康熙三十年知縣張光祖始命永芝與宋景愈續

成之時當亂後書籍不備又無舊志足徵故未盡所長

然奉檄修書五月畢事諸所編錄略而無濫簡而不誣

謙慎之意時溢言外

永芝原跋曰癸酉初夏余承明府張公命使踵宋子景愈編次南陽

縣志憶余顧何人而能爲志哉蓋以志之爲書與史實相表裏志之人物名宦旅寓節婦烈女方伎仙釋卽史之本紀世家列傳也志之方輿秩祀田賦藝文卽史之諸書諸志也一經一緯互相發明然後能使上下古今

曠如指掌余顧何人而能爲志哉第以明府命誼勿容
辭乃搜輯諸史閱兩月間綴補成帙其中分地理爲一
卷建置爲一卷賦役爲一卷官職王侯爲一卷古今人
物藝文詩歌各一卷共爲六卷總爲商陽縣志然自分
翻閱未遍微輯未廣古來人物見之載籍者旣多掛漏
而近人行事孝子忠臣堪爲法戒者又限於見聞亦曷
能闡其幽而發其微耶樛櫟匪材誠不免濫竽之誦雖
汗顏爲之而歉然於心終未能已也因編紀完以數言
自述厥
哀於末

景愈邑諸生不詳其行義永芝自稱踵宋子後
蓋其書未成而前卒歟永芝兄永蕙字其芳歲貢生亦

與纂修後官杞縣訓導

節舊志及
採訪冊

祝復奇號大崖其先江西之清江人父興祖明崇禎中
知嘉魚縣卒官復奇孤子值鼎革流落楚鄂閒友有官
南陽者招與俱遂入南陽籍以國子生考授麻哈州知

州麻哈漢苗雜處號爲難治且不事詩書復奇恩威並
濟修學宮延師儒期月閒遂變其俗康熙癸卯分校鄉
試稱得士焉麻哈旁縣曰清平奉 詔裁歸麻哈復奇
兼治之撫綏有方報最陞戶部清吏司員外郎未去以
野苗肆逆望誤羈延困守者十餘年吳逆據黔中復奇
逃竄山箐搜得之授以官辭不就黔平復奇率三土官
投誠又招安永甯州及南安衛叙功授永甯州知州調
貴陽同知引年歸復奇善談論好汲引後進周恤急危
無幾徵德色人以此服之著有黔南詩集一卷藏於家
子萬章

劉青霞懷
獨軒集

萬嵩皆知名萬章號雲窩進士官蔚

縣知縣不善事長官被劾免歸主講紫山書院爲人短
小精悍少負才氣以詩文自雄旣罷歸更號硜硜子其
捐介而曠達之士歟萬嵩工書亦有名庠序

任學椿
采訪冊

方邀字次谷歲貢生明南京吏部侍郎九功子也少有
才名國變後客遊南北謀爲祿仕以養母母亡遂歸窀
僑棲於蒲水之壩因號爲涓壩逸叟著有餽禮館遊草
雲堊菴寓稿逸圃外編艾納負暄談錄各一卷邀生長
亂離親見縣城圍陷故所紀錄多補史乘所未備云

王宗

網采
訪冊

趙象鼎字卜年性警敏膂力過人少長以俠聞已而折

節讀書然不事著述或勸之曰趙某知恥者胡爲此家
貧衣服不完得錢輒與人嘗三日不舉火當窗危坐晏
如也卒年七十餘有女適拔貢生郭璜能詩文工爲歐
宋字亦剛健有父風

見馬騰蛟
所撰墓表

喬世龍字鳳吾先世葉縣人順治初遷南陽以居積饒
於貲好施與值歲祲爲粥以食餓者所活無算世龍不
知書然好書特甚爲子擇師不惜百金費聘江浙名流
恒夜分屏息戶外聽諸子誦讀雖嚴冬不懈有少惰者
旦日必與笞每垂涕謂曰吾以少遭亂離失學恒自痛
若輩第以讀書償吾志吾死不恨矣卒年七十三金壇

王汝驥表其墓

表云歲乙巳汝驥以河南當事者延上

其父書踞而請曰先大父有至德隱行不幸沒久矣夢
雷父諸父圖所以不朽之幸先王之來使夢雷冒以請
惟先生哀而許之喬氏世世子孫將賴焉余察生之色
甚摯不敢以其言不足重爲解謹如其狀畧爲論次焉
君諱世龍字鳳吾其先葉縣人君早孤值流寇之亂七
歲播遷南陽依外氏以長家少經亂離無資以學遂終
身不知書以居積業饒於資好施與鄉里常以爲賴值
歲祲爲粥以食飢者所活至千餘人郡邑長者皆以君
爲非常人宜大其家也而君性好書獨異甚有三子其
欲教以書雖飢渴弗若顧竊輕其里之名能文者求吳
越名士館之家歲不惜百金費人皆以爲非其家所稱
君卒不懈每聽諸子讀書則屏息戶外不使其知雖嚴
冬必蠟縮以伺率至夜分以爲常有少懈者旦日必與
答每垂涕謂曰吾以少遭亂失學恒自痛若輩第以讀
書償吾志吾死不恨矣以故諸子咸刻苦於學能立君
皆及見其有成年七十三以終配徐氏實與君有同心
持家教子迄於有成者皆其內助云君於康熙甲申年
七月初一卒徐以康熙庚辰年九月三十日卒合葬於

西郊之新阡三子長思謙邑增廣生卽夢雷父也積學
尙義能繼成君志次思恭邑廩生尤南陽知名士也教
受里中生徒至百餘人次思讓邑庠生孫男女十有一
人皆業儒長卽夢雷以廩生受知今學使王公試第一
今在書院中文行嶄嶄余尤心重之嗚呼君一不知書
布衣耳其性命於書若是語曰造物之報人也不於其
人而於其人之天若君非以書爲其天者耶視世之爲
官貴人皆貨之急而書之厭者與君之得報宜何如
也余於君諸子未及交卽夢雷觀之其將有以報君未
可量故書之於墓石未能悉舉其善而獨詳其好書之
概若是使喬氏世子孫食書之報子思恭孫夢雷均
而勿忘其所自嗚呼是君之志也夫

以學行知名夢雷曾孫泰運拔貢生敦族誼歲時伏臘
必萃長幼於祖塋而歸餽於主祭者家著有容安齋詩
草弟泰清字月亭能詩少弟泰庚字星白善書而族弟

秦平字星垣歲貢生家貧力學性元爽胸無宿物同治
初四關議分築四砦功既半或病其害已白當事通爲
外郭郭曠二十餘里不能守前知府顧嘉蘅方客居城
中甚憂之以告於長官不聽四年春巡撫張之萬駐軍

城中秦平上書爲陳五不可巡撫韙其言會嘉蘅復權

府事乃命卽郭爲裏牆改築之如秦平策

縣案

卒年九

十餘子作璧字蒲侯與秦庚子作父同歲拔貢生喬氏

自世龍後代有聞人當秦運時羣從子弟一歲以優拔

貢者三人督學使者何金壽甚喜之至今縣中稱世學

者無喬氏比云

雷履棠
采訪冊

姜獲義兄弟六人相義讓鄉居以瓦屋爲貴祖遺二楹未決所歸獲義曰父母最憐季弟應以歸之雍正六年歲歉獲義乃悉出其糧百餘石給其村陳旺山等一

百四十家又施地作義塚以埋異鄉之客死者

彰善錄 偶編

時又有胡加律歲貢生臨終焚貸券數十紙

王衍續 采訪冊李

芙蘭屢贖叔父與弟產而歸之

彰善錄

而吳一體獨以士

一世同居聞一體字萬育嘗曰吾家世世同居得力在認真與不認真認真者綱常名教讀書務農不認真者衣服飲食之豐約言語意見之是非也時以爲名言乾

周明德字復初其先閩人也父流寓至宛因家焉明德

少讀書通治理農田水利尤所研究

石筍山房文集

乾隆中子

遐齡爲榮河臨晉等縣令迎明德之官嘗微服閒行問

民間疾苦歸卽以語遐齡諸不便於民者悉罷之有所

利益次第舉行焉考績爲諸縣最久之改官永濟永濟

民性獷悍敢拒官府明德曰是特頑民畏死挺而走險

耳凡爲吏者當與民相親親則其情通乃可徐徐化也

使遐齡入山中召其父老諭以恩信每出則載錢以行

勸耕者恤老者旌其子弟之秀異者山中人漸與遐齡

接稍稍知訓乃縛其尤不法者召父老而語之曰若可

誅不皆應曰誠當乃置之法由是奸民屏迹風化大行
遐齡既爲令數年民愛之如骨肉每日非獨吾令君之
賢抑其父者賢父也俄而明德卒民爲罷市聚而哭者

萬餘人立廟祀焉

王會汾書
周復初事

初榮河與韓城夾河爲界

韓城人嘗侵其地遐齡爲令乃爲清釐而歸之榮人尤
感焉明德喪歸兩邑人不遠千里負土成墳伐石立墓

上山陰胡天游爲文表其阡

石晉山
房文集

遐齡字紹彭乾隆

庚申進士官永濟時有訟者夜餽黃金一器卻不受及
庭訊一斷以理退語人曰吾不能使金不入門自愧多

矣奈何矯情以爲名乎卒年五十六

李蘆臣
採訪冊

李元方雍正時諸生善草書赴汴路觀逆旅媼爲餅歎曰此如李元方字手熟則妙耳因自道姓名王人大喜爲具酒食求書居數日乃去其後稱善書者則有馬載羲張均徐懷仁而米文甲張春霖獨以工篆隸名載羲號六橋嘉慶中舉人性方嚴家徒壁立然喜施予故以善書名求者或不能得嘗歲暮有故人子求升斗載羲無以應爲書楹帖數幅其人大喜過望去均字以癡武生曾求書於載羲不時應怒而歸益購帖閉戶摹擬數年出所書示載羲乃大驚懷仁城南人書宗董趙以歲貢生終文甲字春山廩貢生官內黃教諭能爲小篆及

八分書督學使者姚元之見而善之延至行臺時爲代
筆以應求者春霖字潤若邑廩生善隸書名亞於文甲
家貧篤友愛母弟與屢析產而卒合之喜汲引後學一

言之善稱道不容口性嗜書多所論著年六十一卒著

有讀左瞽談兵制貢舉罪言藏於家

王宗綱魏汝坪
李士驥采訪册

李文奇縣南界中鎮人先世籍新野曾祖兄弟二人明

季嘗率眾保聚賊至輒殲賊首號一斗穀者怒甚傾隊

至戰終日矢集如蝟兄弟並肩死文奇少饒膽略乾隆

間鎮有逆旅主人能爲鴉鳴而鴉盡鳴卽促客早行凡

客貨充盈者往往於屋內斃其命或尾至河灣殺而奪

之擠其尸河內文奇乃於宅邊築樓夜懸燈門外更僕
坐客有自南北來者則止宿於家兼施其食夜行者必
邀入屋天明始聽其去如是者十餘年鄉里稱之

右見
范金

鑄采
訪冊

何昱字子昭一字質夫幼有至性六歲喪母哀感弔者
事繼母至孝稍失意輒嘔泣母悅乃止初從父受學質
鈍然勤甚家故貧且樵且讀歷寒暑不輟所憑几當指
畫處泐入寸餘其堅如此太守莊有信修宛南書院成
選郡中有學行者肄業其中昱與焉有信嘗夜半微行
察諸生勤惰獨昱聲琅琅與更柝相應笑而識之舉鄉

賢王文莊公以相期乾隆辛卯成進士選岢峨知縣縣
當孔道地瘠民貧昱爲政廉靜自持減鹽價節夫馬命
民彌山栽樹暇則集民堂下躬自教以詩書在岢峨期
年會大吏某家奴過岢峨索賂勢甚張昱不與奴以惡
言喝之昱怒坐堂皇拘奴而叱之曰汝倚乃主人爲上
憲耶昱奉天子命出宰是邑未嘗取分外錙銖何有錢
給汝去去告汝主人官可罷錢不可得也立備文解至
省大吏某恚甚遂以事中傷之落職昱廉所得俸又嘗
捐以修橋梁旣去官貧不能歸學使者曹失名聞昱名聘
入幕佐以資斧始行初昱舉進士歸班家居十年闢尋

樂堂以十約造士士翕然從之罷歸後從遊者益眾曷
爲人長身方面潤口氣象端嚴每雞鳴起端坐終日無
惰容居平退讓恂恂是非可否之閒較然不淆遇事循
理直行不知有機巧學宗程朱篤守經訓子史雜占古
文辭下及佛老氏書皆爲評駁嘗著不見可欲而心不
亂說云此老氏說莊周信而然之耳然則見可欲而心
卽亂乎則其爲心可知卽所以治其心者更可知此仍
告子生之謂性之說何異犬牛則必墮聰黜明獨居幽
室而不見一物乃能不亂一出門而紛至沓來雜然集
矣儒者則不然曰非禮勿視非禮勿聽非禮勿言非禮

勿動又曰視思明聽思聰言思忠事思敬如是則何亂
之有又曰思則得之不思則不得也先立乎其大者則
其小者不能奪也如是又何亂之有又曰見賢思齊見
不賢而內自省又曰見善如不及見不善如探湯夫人
亦安得所見之必皆不可欲而凡天下可欲之數必皆
不入吾目而皆不見乎夫見不見適也欲不欲心也養
心有道見不見皆能爲功於人老莊不達其本而故爲
諛辭以惑世豈知道者哉最後著四書講義於大學明
德中庸性道之旨尤深研究多所發明一時同里樊士
俊周軼凡從旻遊者畢大典之倫淵源所漸類多佳士

年八十一卒門人私謚曰文定先生

尋樂堂瑣說
大典何先生傳謚

說
輜
軒博紀

子敬之嘉慶中舉人亦善士

王銜蘭
施集

樊士俊字元秀家貧爲學里塾中且教且讀年二十餘
爲諸生與時輩不苟合尤輕絕富貴里中富人延之而
有傲色士俊覺卽去唯與同縣何昱友善務篤內行同

祖弟貧不能自存引與同爨妹嫁無倚並其夫婦留養

之卒年四十餘昱深惜之

何昱樊士
俊墓誌

同時又有周軼几

號蓮塘跬步不苟亦爲何昱所重

王宗綱
宗訪冊

畢大典字慎五家貧溺苦於學父使食牛坐而默誦牛
食旣不知也家人以爲癡旣壯師事同縣何昱稱高第

弟子嘗爲諸生以挨保歧考除名知縣包敏招而謂之曰吾誤子子勿墮厥志因出所著書授之使具呈於府白其事時知府某寵一優伶或謂但一飲優人事可諧大典曰是商鞅因景監也烏乎可久之得原名應試督學使者鮑桂星閱其文大奇之拔冠諸曹明年舉於鄉以父母老稀赴禮部試癸酉歲大饑招族人貧乏者以所得館穀分界之連居考妣喪號泣眼爲之枯丁丑大挑選澠池教諭出貲修學宮又特爲明儒張抱初建專祠置奉祀生年六十四卒官喪還澠池諸生劉大猷輩皆送至南陽安葬而後返著有果育堂稿行世

胡恩論
畢慎五

先生 門人胡恩綸字潤之道光丁酉舉人嘗從祖官商

城學署故知縣以虧帑爲後任所持停柩荒寺恩綸傷之乃私具二十金僞爲京員唁信乘夜抵寺門投信與

金而去後任聞之大驚遂爲設計歸其喪恩綸官新安

教諭著有蓉舫詩草

任古盜胡蓉舫傳

雷劍字起豐增廣生員先世豐城人前明有官商水者後遂占南陽籍劍家貧喜讀書自以奔走衣食未盡所學暮年有田數頃乃仿范文正公義田遺意設承啟田祭祀所餘悉以贍族人讀書者嘉慶初與千叟宴卒年

九十

承啟田記

同時與宴者有秦世璽歲貢生年九十

葉琳采訪

王夢麟字聖瑞縣北石橋保人乾隆己未武進士官襄陽申營守備累遷至漳州遊擊初至任有大猾二歲以賭爲事誘勢家子弟入局爲姦利聞夢麟之至也各具千金爲壽夢麟卻之因特申厲禁賭風大息盜賊亦屏迹生平疏財重義人有急難傾囊助之不惜所至有廉惠稱士民咸畏而愛之夢麟喜爲詩尤長近體告歸家居教子孫恂恂務爲文學數年卒夢麟曾孫元峻字魯園諸生少與弟元嶸同師事縣教諭王辰順辰順病沒子幼元峻兄弟爲經紀其喪復搜輯其詩文佚藁梓而行諸世士林多之元嶸字仲高號學峰拔貢生官儀封

教諭訓迪士子務以敦倫飭紀爲要廉不輕取與歸無

餘資著有拙園詩草藏於家

王聖瑞墓誌 魏汝坪采訪册

葵陽集

王忠尙字肄夏一字竝齋諸生夢麟兄子家世能詩忠尙獨以行誼顯顧不習舉子業嗜儒先語錄日手一編

危坐披誦時復自省尤篤信呂氏新吾之學少以孝友聞性端凝終其身未嘗有跛欹容每出遇鄉子弟倨慢者必正色責之其有衣冠不正則親至前爲正其衣冠而告之曰心爲身之主身不正何以正心聖人言居處恭蓋謂此也鄉人化之同時以篤行知名者則有張秉

德秉德字本初號澹齋邑諸生家博望鎮東

杜熾張澹齋墓表

長不滿五尺

杜熾詩集

性剛毅不修飾讀書務明大旨教人

必以小學爲入門尤時兢兢於無恒之戒遇事於義利之辨最嚴嘉慶中徵赴千叟晏辭不就卒年八十門人

趙桐亦剛直年七十餘每見秉德必悚立執禮

杜熾張澹齋墓

表王廷襄采訪册

魏佩字紉蘭父中立舉人有學行佩幼慧能強記嘉慶

丁卯舉於鄉數上春官不第歸輒載書盈篋時重小學

訓詁音韻務爲精核佩嘗問學於鮑桂星王引之號爲

通博同里喬泰運嘗謂人曰與菴亭語出口便錯菴亭

佩別號也耽吟詠酒後耳熱卽吮毫擘紙頃刻千言晚

年杜門謝客惟與舊友陳觀保趙一德門人王汝甲甥
王元嶸飲讌唱和爲樂著有菡亭詩文集若干卷子樽
字星槎邑諸生以善書名

葉琳采
訪冊

汝甲西華人教諭辰

順子也觀保一德元嶸自有傳

任古益字松亭道光戊子舉人大挑授密縣訓導在任
十年以親老乞終養設教里閭多所成就

張鳳圖
采訪冊

在密

縣時知縣因加漕事激眾怒大譟毀垣知縣慚怒將興
大獄古益力爲排解民始按堵年七十三卒

張春霖
采訪冊

翟

粵字漢泉副貢生性和易無疾言遽色事親能得父母

歡官密縣訓導

閻學之
采訪冊

張存義字子顧先世開州人遷南陽貧甚兄弟嘗易衣
而出爲諸生益刻厲教後學勤而有威是時士風敦樸
鄉塾師黎明必起非盛暑冠帶不去身存義在塾弟子
無跛倚者事寡嫂尤敬鄉里難之門人秦大章喬秦平

輩著錄者數十人多以行義顯秦平自有傳大章歲貢

生家貧爲童子師以自給非其義弗受光緒四年大饑

竟閉戶餓死年八十

吳天德撰張先生
碑雷履棠采訪册

黃允中字執甫馬營人少從世父金甲讀書豫山上金
甲舉於鄉未幾卒允中爲學究心經訓通說文嘗取四
子書中字依韻分疏爲四書字說學者便之當是時縣

南馬攀龍解音韻濼河張作謀能強記而允中通訓詁
縣中號博通者推此三人允中尤善啟迪多所成就道
光已酉舉於鄉考取覺羅官學教習以團練功保知縣
未銓卒著有南陽異聞錄紅蘘山房詩文若干卷卒後
多散佚惟字說一卷存於家張作謀籍鎮平攀龍字躋
堂舉人謙厚有局度所著韻法傳真五美圖積二十年
考驗而始成鄉先賢王鴻儒凝齋集板散失攀龍手書
而傳之

宋繼郊碑

允中弟先中拔貢生亦有學行爲縣人所

重

黃治平采訪冊

陳觀保字竺園拔貢生性和易好客喜爲小詩陳氏故

籍山陰善釀觀保姊夫馬載羲壻李廣福門人趙一德
皆邑名士二子之善之惺亦能詩畫每嫻舊雅集輒對
酒揮毫時傳其勝之善亦拔貢生著有師竹軒詩草廣
福少有重名年十三能覆誦十三經時學使鮑桂星方
苦士人空疎發落時獨舉廣福爲勸廣福後以拔貢官
訓導觀保孫壽整本名仲衡諸生幼以才氣輕鄉里嘗
與許克勤爭一故事歸檢而誤乃大悔自是與人語恂
恂若無知晚年家益窘積債累累然故舊有急輒分所
有與之病亟語其子曰忠厚德之基也勿以貧爲病

張

趙一德字小尹拔貢生善爲詩先是邑人宋元亮王淑
詠皆喜爲詩然罕有存者至一德始著喜遠遊每客歸
解橐中裝輒得詩數百首著有聽雨山房詩二卷其後
有崔懷玉亦善爲詩詩亞於一德懷玉字韻山歲貢生
善談論能解紛難咸豐同治中軍事棘官不暇給乃設
籌防局舉懷玉與劉若棣董之若棣敢於任怨懷玉時
時佐以謀故鮮敗事郡城之被圍而解也懷玉與有力
焉以教職保知縣後以築通郭與當事者有違言乃屏
居故園嘯傲自適著有暫園詩鈔藏於家

中州詩鈔喬景濂采訪册

閻掄魁字雲蟠父文麟嘗出粟振饑掄魁以優貢官安

陽訓導告歸教授生徒不受脩脯其貧不能讀者又時

周恤之父年八十卒與弟秋魁同以哀毀致疾初掄魁

無子偶至郡見鬻子者夫婦相向泣詢得其故傾囊金

贖之後果生三子人以爲異子丕勛丕式丕承並以孝

友聞

宋志稿

同里諸生許奎亦忠厚爲鄉里所推

袁清江采訪

李紱先世鄧人遷南陽父青黎官盧氏教諭常捐金修

學宮

見顏檢所撰墓誌

紱深於醫成豐初官戶部廣東司郎中

以醫名京師每將補外長官輒強留之最後補甯波知

府未之任以艱歸卒

喬景濂采訪冊

子昇安字旭林諸生簡默

寡交遊著有散閒山房詩草守宛瑣記

本集

縣中以醫名

者李雨若善小兒醫弟遇文善眼科年輩在綉前雨若
孫承之十歲喪母廬墓三年爲鄉里所稱

熊之屏
采訪冊

李忠道字善告候選典史城南堰岔村人也咸豐六年
紅巾賊鄧大功破林水迫令堰岔出兵三百爲助忠道
佯應之而陰與堂兄忠毅謀令族人文南本元等詐降
賊乃乘夜潛赴南鄉糾合村堡共舉義旗以滅賊會天
大霧因四路設伏以誘之而文南本元自內應殲賊無

算

李廉泉
采訪冊

魏寅采字敬之其先會稽人國初遷於宛寅采少讀
書多所通曉長於詩賦年十九就童子試學使吳慈鶴

見其賦大異之遂入泮終歲貢生居家教授多所成就
性沈靜寡言笑咸同閒髮捻交訂宛當孔道數受敵凡
禦防諸事實采悉與焉而賞不之及亦不言也著有佳

日齋集詩經古韵譜藏於家

樊環紫苓集 葉廷杰佳日齋賦鈔序

許克勤字元惕少好學家故貧日恒不舉火克勤學愈
力咸豐戊午舉於鄉講學宛裕閒教人以敦飭倫紀爲
主雖童蒙必以是課之諸生來問事務明義理端趨向
門人或以舉業與聖賢之學相妨問克勤曰 國家制
科本以求實行非徒取空言果能以聖賢之學應制科
不尤爲 國家所特許乎有較諸儒語錄優劣者輒勗

以躬行心得勿輕弄筆墨習傾軋故終其身不輕著作
尤嚴取與以大挑官溫縣訓導值大饑脩脯一無所受
逾年以老辭文具未上而學使試檄至或勸少留過考
爲歸老計不聽竟歸年八十卒

王潰許先生事略
州書院碑

墓表

樊璟字玉亭先世山西人祖官許州州判流寓南陽遂
占籍焉璟道光己酉拔貢生舉同治元年順天鄉試十
三年成進士官貴州都勻知縣爲政廉簡號安靜吏逾
年卒官璟爲人和易與物無競善處人骨肉閒雖遇暴
戾恣睢從未以聲色加之而見者意氣自沮爲拔貢時
家苦貧泊然無營親故爭餽遺之然非其人弗受也廷

對時舞陽前貢士朱光鑒以冒籍爲同鄉官所持不得
與廷試環以淡言排之立解光鑒由是入翰林每道及
環輒歛歔不禁云著有紫芥山房集一卷

喬景濂
采訪冊

王國用字賓于歲貢生幼時使耕泣弗願姑送入塾記
姓名而已而溺苦於學昕夕無少閒師絕矜異之語其
家縱之使學國用益肆力焉旣壯與同縣許克勤言行
切磋務歸於實同時王東巡字春山恩貢生亦有學行
少家貧日啜一薄粥力學不怠卒年八十九

張春霖周
鳴鳳采訪

趙九臯字鶴亭幼有至性事親未嘗先父母寢食同治
初嘗侍父疾傳聞皖匪至父迫使逃不可已而遇賊門

中搜其衣惟得醫方藥物賊義而釋之

王宗綱采訪冊

時以孝

友著聞者又有蕭長芳劉鉦呂成文之屬長芳縣南平樂村人年十一從兄之田兄墮田側潭中危甚長芳呼救者未至趨下以手援之乃並曳入水兄以救出長芳竟溺死鉦字石卿邑諸生善事繼母家累萬金繼母僅予田三十畝使出後其伯父貧不自給鉦不以爲怨

燕心

正蕭童子碑張春霖采訪冊

呂成文家貧甚母老病成文每負以出

入爲人傭不出鄉里昏必歸省冬寒必先煖母被令温然後寢數十年如一日

李廉泉采訪冊

張勤思字有九太學生以名德重鄉里閒人稱爲張善

人云事繼母以孝聞性慷慨遇事敢任赴人之急如飢餐渴飲同治六年皖匪犯境勤思與其鄉人避難於附近之桐源若是時賊甚張所過村堡多殘破而若失於修葺居民惴惴有戒心勤思首率人增高庫薄板築眷搗手任之鄉民感悅助者益眾不日而告畢賊至不敢犯一鄉賴焉未幾而裕州會匪之事起先是有白蓮餘孽止於裕之虎山煽惑居民約期爲亂遠近不逞之徒爭應之以勤思賢欲舉以爲首勤思偵知夜邀至家責之曰汝曹欲覆宗耶自污污人乃欲吾覆宗耶今天

子聖明百官率職汝曹不過爲饑寒迫耳若然吾能任

之必欲覆族當先殺我我不忍見汝曹駢首也勤思發言慷慨流涕覆面皆相顧動色稍稍引去其事遂寢光緒三年歲大饑人相食勤思鳩集同志築室於元帝廟側饑者食之病者醫之流亡者安集之全活無算年五十無子家人爲置遶室入門涕泗詢之則士族女而同姓也慄然曰良家子吾義不可辱爲擇吉士具奩嫁焉至六十時繼室杜氏連舉四子一女人以爲爲善之報云卒年八十二

胡錫釗
采訪冊

李作梅字均平城北太乙寨人咸豐同治閒髮捻匪擾南陽諸寨堡多畏賊或密送財物有勸作梅者作梅力

拒之趨命繕守具未幾賊游騎至寨右然大礮擊之斃其馬賊旋去鄰堡聞作梅寨竟不破始知賊技敢固守矣作梅少嗜書篤友愛兄作楫有學行早卒作梅事寡嫂甚敬有識量常冬夜就寢微聞窗外步履聲疑而窺之則其佃而盜米者也移時徐曰尙未足用耶盜驚去卒亦不問年六十餘卒

李士驥
采訪冊

王蓮臺字慈蔭祖衡有學行師事同縣何昱以諸生終

張允文
墓表

父修齊世父修身皆嗜書愛客有名庠序蓮臺

幼有至性事父母寢食未嘗先非應試未嘗輕去左右丁內外艱廬墓六年嘗偶歸日夕還墓廬途遇暴風雨

跌地不能語佃農范姓方寢聞若呼急者趨出至則掖
蓮臺墓左甫人廬冰雹作咸以爲異光緒元年舉孝廉
方正不赴自闢塾村中教子弟必先授孝經使成誦然
後授他書暇則摘先儒語錄及經史嘉言善行條輯成
帙親爲講解生平不妄交人然每與卑幼者鈞禮初避
兵道中得遺金二十錠坐候失者不獲乃悉以振饑寒
分毫不自私事實冊自行制科獨蓮臺無譏詞云喬景瀛采訪冊
卒年五十餘著有淑慝鑑理學粹言桂芳軒稿存於家
曹學彬字再華先世本晉人父以醫名於宛因家焉少
師事同里喬泰運訥於口終日不能成誦使背錄講貫

不遺且多心解師以故器之爲文率平易不矜才氣頗長於名理學使張之萬得其文絕擊賞之同治初縣人卽周氏宅爲崇正書院學彬其首倡也光緒丁丑成進士籤發廣東以知縣卽用時大饑艱於資斧及抵粵以憑限遲誤鑄二級久之始復原官委解京餉赴都引

見是時前學使張公已入軍機觴粵撫倪文蔚學彬與焉爲言其文行而惜其屈返自京卒於鎮江舟次

喬景濂采

訪冊

錢獻琛字來之生而負氣敢任傲睨不可一世所爲文未嘗屬稿伸紙疾書亦無點竄顧嘗使酒侮坐客客無

敢忤視戚友有不可於意亦必正言責之無稍徇隱人
以是折服焉與同里曹學彬喬廷璧尤善嘗同爭周氏
宅卒奪之置崇正書院光緒己卯舉於鄉再試禮部不
第遂絕意進取年六十餘卒

喬景濂
采訪冊

方立志縣東南薛家橋人咸豐十一年亳匪擾境家人
皆避去獨不肯行眾勸之曰賊亦人也豈無人心吾以
善言說之當必聽否則死耳因按劍獨酌堂上賊至先
舉酒爲陳大義不聽則大罵揮劍擊賊不中賊怒割其
舌齧殺之年六十餘同時有孔鳳山者年九十亦端坐
諭賊賊脅使降卽大呼曰安有孔鳳山而降賊者乎賊

亦殺之鳳山賒旗店人諸生寄籍裕州而城北李向榮城南張鏡清胡同心亦以勸賊被害向榮年八十四鏡清邑增廣生始有皖匪二人入室鏡清慷慨陳詞再三皆投戈聽命因出至門外見一賊牽婦女而戲鏡清勃然戟手怒罵曰賊奴所爲如是何能久行見汝曹駢首死矣賊怒遂遇害同心字靜一好讀書不求聞達咸豐

七年以罵賊見殺

節宋繼郊稿王錫範文葉珊宋訪冊

楊向榮字子欣縣南關人富而好施南關外故有襄陽渡跨涓水爲橋起霜降訖清明歲拆歲修以爲常夏秋則易以船舊與縣北涓陽渡橋船皆官建修葺不時行

者苦之道光初有李子賢者以賈客逕清陽渡爲舟子所辱私自誓曰吾他日若得倍利必歲置船與梁於斯水上不使渡者更費一錢後卒如所言咸豐初巡撫陸應穀以樂善好施旌焉向榮自其父清泰在時已力任襄陽渡事費不貲咸同閒軍需繁急嘗毀家爲眾倡城外無女牆而四關多廢甃又白當事者獨出資修之牆成而城守益固時縣中號樂施者彭述米鳳詔名均與向榮等述字樸存兄齡官永甯道卒述事嫂甚敬咸豐七年大饑獨出粟市中抑其價勿昂蒲山南路多石爲買田更作坦途鳳詔字子封嘗買地成價必使收本年

產曰君收止此吾後所獲方多矣鄉里善之

鄭紹康苗懷新采訪

冊

初乾隆嘉慶時民風富厚諸任卹如鳳詔輩蓋多不

復爲意人亦習忘之自咸豐以來始稍稍見稱於時王

天倫字愔典嘗獨修桐河石橋施藥餌助鄰里喪娶之

無力者年輩先於向榮

戴廣恩采訪冊

袁舉字霞軒兵亂時有

婦姑避其村婦臨產將不育舉知館而活之與向榮同

時

謝式南采訪

周克敏字仲嶷石鼓泉人性謹厚謙光可挹少爲諸生

出督學李鴻藻之門嘗揭天理良心字示諸生故克岐

爲學專致力於此晚尤潛心宋儒書處族眾甚和子姓

無異視咸豐中詔行堅壁清野法縣境多築圩自衛克岐與族弟於京對築石寨寨爲縣最鄉人賴之於京字

依之兵部員外郎性坦易始爲寨遠近避入者常數百

家悉予飯食不取值寇去乃已鄰有人誣於京佃其墓

田者旣視券非是其人慚且泣不敢仰視於京徐曰子

有喪未葬乎胡不再謀卒以其地予之

王廷襄采訪冊

同時博

望陳忠亦以寬厚有容爲鄉里所推

張翼軫碑

而克岐里人

冀清純高世俊尤以長者稱清純性勤謹有非意干者

輒以溫語撫之嘗誡子曰吾遇事無他長惟能喫虧耳

世後年五十餘猶於父母前嬉戲博歡笑嘗赴郡試道

遇死者爲傾貲市棺葬畢竟歸子中禮官臨潁教諭往
省之中禮具車不肯乘曰吾習勞且爲天地惜力也卒
年八十餘

李重華周萱
堂采訪冊

袁純字亦齋太學生爲人慷慨有將畧咸豐十年皖匪
繞境純以新募鄉勇卒遇賊於城南沙窩寺擊卻之殺
賊數人純亦負創夜見賊連營數十里火光熒熒似繁
星知眾寡不敵乃避之鄧州大余營賊由郡折而南竄
則余營適當其衝純見事急自出禦之時賊眾已數萬
純所號召不過千餘村農自平明至午苦戰不少却賊
中有識純者曰服短後衣者卽殺我邊馬之人也賊怒

戰益力幸鄧州援兵大集始解圍去南新之交有劉落
林者數爲張總愚鄉導提督宋慶檄純偵之捕得伏法

一方快之

李廉泉
采訪冊

張麟邑趙氏僕也事趙氏厯二十年歲纔得僱錢五千
趙氏兩世皆孀二孫幼鄰有門姓者負趙金急索之乃
償以田趙氏婦姑往收其麥歸遇門於道門毆其姑姑
倒移刃刺婦血出仆地麟聞奔救抱門不釋手門反刃
刺麟麟堅曳之倒濠中水爲赤門卒不得逞趙氏獲全
訟於官治以法焉邑舉人王翰屏爲作義僕贊

李芳園
采訪冊

右人物二卷皆據列史及近今所采訪而輯之閒攷

南陽諸氏族所出而知歷代人物遺佚者多矣蓋自

苑侯受封而有苑氏

見路史

大岳錫土而有呂氏申氏

呂改爲甫故有甫氏申伯啟謝故又有謝氏

見說文姓纂通

志略

伯宗之後家於南陽則涅陽宗氏所自出唐杜之

裔食采於衍則杜衍杜氏始大

見唐書宰相世系表

而有水之

陽實有育氏

見路史

此皆縣境得姓之最古者也宛既

入秦秦始遷民於南陽南陽氏族之繁自此始是故

直氏出於寒侯卓氏原於衰德

見通志略

而宛有孔氏

見史

記李氏任氏

見後漢書

彭氏

見寰宇記

趙氏

見後漢書及北史

西鄂則

有張氏劉丹封安眾安眾別有劉氏

見漢書後漢書

滄陽有

樂氏

見唐表
寰宇記

並卓卓爲世所推自魏晉亂離邦人分

析半寄於他邑而世家大姓猶或憐憐於本望至於
唐宋之季而舊族土著蓋已鮮矣金元及明或屯或
徙 國朝以來客籍十七於是朱氏藩封閩臧宦寄

金華黃方葉陳之族來自江浙周李田楊魯魏之姓

徙自河華王分爲六

有本縣舊姓有遷自山西者有
遷自浙江者而安眾王氏爲明

衛輝王孫朱鎮國後大夫莊王氏始
實姓胡王文莊公上世則趙氏裔也

張分爲五有遷
自山

西者有遷自浙江者有遷自遼陽
者有睢陽公之後有遷自開州者

他尤不可勝紀其

諸姓爲世所希者則有賚氏圓氏率氏

見續
通志

迭氏

現
居

博望

葛邏祿氏

遼金元三史國語解作郭囉洛氏
四庫全書提要河朔訪古記元郭洛

囉納新撰納新族出西北郭囉洛因以爲氏元色目人散出天下故納新寓居南陽後徙鄧縣

常官南陽衛故南陽又有庾氏

見續通志

猛鎮之後避難

而改姓故又有勇氏

見采訪

斯亦曩時鴟夷趣馬之流

亞歟

通志略鴟夷氏范蠡後趣馬氏

若何出自王以

楊繼劉譌皇甫而爲黃與夫天方

有巴海擺買諸姓

歐羅巴

人之族亦頗有焉自苑氏以下蓋皆嘗聚族於斯而

諸書所載或顯或微至有一姓不得一士雖云譜牒

放失不可復詳然其潛德遺行亦必有久而後光者

惜哉惜哉今故總叙於此以俟後有博雅君子攷而

增焉

南陽縣志卷十一 下

列女

后妃例不載已
旌表者詳祠祀

周

召南申女

百里奚妻

召南申女者申人之女也既許嫁於鄧夫家禮不備而欲迎之女與其人言以爲夫婦者人倫之始也不可不正傳曰正其本則萬物理失之毫釐差之千里是以本立而道生源治而流清故嫁娶者所以傳重承業繼續先祖爲宗廟主也夫家輕禮違制不可以行遂不肯往夫家訟之於理致之於獄女終以一物不具一禮不備

守節持義必死不往而作詩曰雖速我獄室家不足言
夫家之禮不備足也君子以爲得婦道之儀故舉而揚
之傳而法之以絕無禮之求防淫欲之行焉又曰雖速
我訟亦不女從此之謂也

劉向列女傳 頌曰召南申女貞一修容夫禮不備終不

肯從要以必死遂至獄訟作詩明意後世稱誦

百里奚妻失其姓奚爲秦相妻在秦知之而未敢言奚
坐堂上作樂所賃澣婦自言知音因援琴而歌曰百里
奚五羊皮憶別時烹伏雌炊扈屨今日富貴忘我爲奚
聞之乃其故妻也遂還爲夫婦

見風俗通

漢

謝躬妻

陰瑜妻荀氏

見祠祀

王子雅女

謝躬妻更始中躬爲尙書令將六將軍征河北躬與光武不相稟承光武不平陽爲慰安陰圖之妻知之常戒躬曰君與劉公積不相能而信其虛談不爲之備終受

制矣躬不納果爲光武所殺

節後漢書吳漢傳

王子雅女西鄂人子雅官蜀郡太守有三女無男而家累千金子雅歿當葬女自相謂曰先君生我姊妹無男兄弟今當安神元宅翳靈后土冥冥絕後何以彰先君之德各出錢五百萬一女築墓二女建樓以表孝思

水經

唐向城令張璠之爲撰孝女雙石樓記

金石錄

三國

諸葛亮妻黃氏

何晏女

諸葛亮妻黃承彥女也承彥河南名士知亮之賢自謂亮聞君擇婦身有醜女才堪相配亮許卽載送之時人爲之諺曰莫學孔明擇婦止得阿承醜女

三國志注

何晏女晏被誅時女亦見收乃爲烏棲曲以寫其哀

見樂

府解題

晉

荀崧小女灌

荀崧小女灌幼有奇節崧爲南中郎將鎮宛爲杜曾所圍力弱食盡欲求救於故吏平南將軍石覽計無從出灌時年十三乃率勇士數十人踰城突圍夜出賊追甚急灌督厲將士且戰且前得入魯陽山獲免自詣覽乞師又爲崧書與南中郎將周訪請援仍結爲兄弟訪卽遣子撫率三千人會石覽俱救崧賊聞兵至散走灌之力也

晉書

南北朝

劉蚪妻樂氏

趙奉伯妻傅氏

劉蚪妻樂氏南陽清陽人廣州刺史藹之姊也蚪有高

節累徵不仕樂氏亦明識有禮訓蚪卒藹迎居官舍參
分祿秩以供焉子之遴除南郡太守梁武帝謂曰卿母
年德並高哉令卿衣錦還鄉盡榮養之理其爲世所重
如此

節南史
梁書

趙奉伯妻傅氏華貝邱人奉伯卒子彥深三歲傅氏孀
居家人欲以改適自誓以死彥深五歲傅氏謂之曰家
貧兒小何以能濟彥深泣而言曰若天哀矜兒大當仰
報傳感其意對之流涕及彥深拜太常卿還不脫朝服
先入見母跪陳幼小孤露蒙訓得至於此母子相泣久
之然後改服後爲宜陽國太妃女侍中謚貞穆

北齊書
金百錄

唐

陸張氏 見祠祀

韓會妻鄭氏

張建封妾關盼盼

韓會妻鄭氏滎陽人從會居洛中夫弟愈三歲而孤鄭氏鞠之如子會後官京師以讒貶嶺南卒鄭氏力持喪輶萬里返葬已又挈幼孤弱弟避地江南每當春秋時祭輒指示愈等祖考行義誨化備至唐制叔嫂服小功

鄭氏卒愈加期服以報之又爲文致祭深述其附育之

恩云

其文曰維年月日愈謹於逆旅備時羞之奠再拜

頰首敢昭祭於六嫂滎陽鄭氏夫人之靈嗚呼天

禍我家降集百殃我生不辰三歲而孤蒙幼未知鞠我

者兄在死而生實維嫂恩未亂一年兄宦王官提攜負

南陽縣志

卷七

人物下

列女

三

往去洛居秦念寒而衣念饑而殮疾疹水火無菑及身
勸勞閔閔保此愚庸年方及紀薦及凶屯兄罹讒口承
命遠遷窮荒海隅天闕百年萬里故鄉幼孤在前相顧
不歸泣血號天微嫂之力化爲夷蠻水浮陸走丹旄翻
然至誠感神返葬中原既克反葬遭時艱難百口偕行
避地江濱春秋霜露薦敬藉繫以享韓氏之祖考曰此
韓氏之門視予猶子誨化諄諄爰來京師年在成人屢
貢於王名迺有聞念茲頓頭非訓曷因感傷懷歸隕涕
薰心苟容躁進不顧其躬祿仕而還以爲家榮奔走乞
假東西北南孰云此來適覩靈車有志弗及長負殷勤
嗚呼哀哉昔在韶州之行受命於元兄曰爾幼養於嫂
喪服必以期今其敢忘天實臨之嗚呼哀哉日月有時
歸合塋封終天永辭
絕而復蘇伏惟尙饗

張建封妾關盼盼者建封歌妓也建封卒盼盼守節獨
居燕子樓嘗作燕子樓詩白居易愛其詩和之而微譏
其不死盼盼得詩泣云自公見背妾非不死但恐後世

以公有從死之妾是玷我公之範也今公歿已久可以相從於地下矣遂不食而死

元

周喜同妻邢氏

字朮魯遠妻雷氏

周喜同妻邢氏喜同官南陽縣達魯赤邢氏從之至正末妖賊犯南陽喜同見賊勢盛與家人訣曰吾與汝等不能相顧矣已而城陷邢氏聞喜同力戰死帥家人數人出走遇賊奪賊刀砍之且罵且前亦見殺一家死者

二十餘人

元史
一統志

李朮魯遠

國語解作富珠哩遠
一統志又作博都里遠

妻雷氏南陽郡公翀

周易系

卷二人物下

列女

三

子婦也遠爲襄陽尹需次南陽拒賊死雷爲賊所執欲妻之乃詆賊曰我魯參政家婦肯從汝狗彘生乎遂見

殺明一統志

明

唐靖王妃高氏

見祠祀

柴文璋妻蘇氏

王本妻司氏

曾孫汝魯妻江氏
汝魯子應修妻陳氏

蓬萊郡主

郭妙才

見祠祀

蘇榘妻王氏

見祠祀

文凱妻高氏

見祠祀

王可敬妻趙氏

見祠祀

馬驂妻崔氏

見祠祀

王家士妻蘇氏

見祠祀

毛振女

史洛書妻曹氏

魏聖心妻王氏
王應徵妻馮氏

田陽生妻徐氏

王統妻熊氏
王輅股妻
高氏
鄧懷寶妻方氏

柴文璋妻蘇氏妙成山東商河人文璋侍其季父斯馥

於德州娶焉未幾歸南陽姑賀氏嘗得危病氏潛禱於

天願以身代斯馥妻譚氏瘍亦危妙成侍禱如賀氏故

兩姑爭欲得之子昇幼有小失輒加訶責鄰嫗或以爲

言曰吾不欲其驕縱若鄉里兒也昇官給事時猶及見

之年六十卒葬城東大學士劉健表其墓

文已見
昇後
陵墓

官至尙書

府志

王本妻司氏文莊公鴻儒山東布政使鴻漸母也以子

貴封淑人制有曰賢聲丕著於六媼懿範兼成乎二子
被寵兩朝見母儀之能備流芳百世知家乘之恒存一
時謂爲實錄本曾孫汝魯繼妻江氏及其子廣南知府
應修妻陳氏並封恭人教子有聲

舊志

蓬萊郡主唐成王朱彌錦長女配儀賓莊國賓郡主幼
穎秀祖父母甚愛之稍長讀孝經論語內訓女誠諸書
過目成誦作五七言詩出語輒驚人尤愛蓄古法書名
畫閒居手不釋卷才名藉甚每遇千秋節必手作繡服
以爲壽值莊王如忌日輒對眞容慘然悲涕國賓好客
有佳客至郡主必命盛酒饌以罄其歡或躬詣庖廚處

分務極豐潔而自奉甚約以是人益賢之年二十九卒

縣人王鴻儒誌墓無錫邵寶表焉國賓字士雋諸生籍

裕州少有美才能詩所交多知名士

何景明寄贈詩云上館宜才子佳名

玉葉光文章奪雲錦衣服惹天香下筆驚鸚鵡吹簫跨鳳凰淮王門下客冠蓋日相望

毛振女名祿父振官唐藩護衛軍校女年十九父母皆

亡弟鶴方五歲無親屬可依女誓終身不嫁垢面跣足

竟撫孤弟成立宏治十六年典寶馮敬以其事啟唐王

王賜紵絲衣一襲月給米五斗命引禮官王瑄送至其

家女竟以室女老今有墓記鐫唐藩優獎令旨

府志

史洛書妻曹氏洛書早逝曹氏年二十四子鑑甫七歲

史氏族有利其產者謂孤弱可旦夕圖曹氏百方防護卒以成立鑑補諸生其小學四書皆曹氏口授也崇禎十六年流賊猝至氏度不能免遂閉戶自經死

府志舊志

先

是縣有生員魏聖心妻王氏生員王應徵妻馮氏亦夫死守貞爲人所稱

節舊志

田陽生妻徐氏崇禎末夫婦避流賊難聞賊已去還至中途遇賊陽生手持短槍賊索槍卽與之賊以槍刺陽生胷死徐氏乘賊方刺其夫卽以口齧賊肩膊賊痛甚遂并徐氏殺之明季南陽遭寇亂久婦女死義者多失紀其可知者生員王統妻熊氏流賊陷城熊攜幼子死

生員王輅殷妻高氏被執不屈死舊志鄧懷寶妻方氏死
亂死節洧左遂葬焉乾隆中其孫始立石表之家志
國朝

徐光耀妾王氏

王松生妻武氏

錢龍起妻李氏

李萬慶妻朱氏

王沂若妻馮氏

周文獻妻呂氏
王守紀妻曹氏

周羽明妻馬氏

馬景援女

韓盧氏

楊克昌妻張氏

王玉長妻曾氏

見祠祀

張天章聘妻白氏

見祠祀

郭振江妻李氏

見祠祀

李元善妻史氏

見祠祀
黃義安

吳氏
等附

白登科妻韓氏 見祠祀

鄭成貴妻王氏 見祠祀

邢雲妻畢氏 見祠祀

萬瑞徵妻周氏

見祠祀 妻王氏等附 張枚

傅啟昌妻王氏

見祠祀 藍瑞 寬妻朱氏等附

徐珠妻盧氏

見祠祀 妻白氏等附 呂蘭

田明道妻徐氏

胡應聘妻包氏

子應聘 妻張氏等

附

張大姑 李綱女

于烈婦

黃洛晉妻張氏

葉廷蘭妻王氏

徐光耀妾王氏性貞介不苟言笑事嫡能盡禮

甫三歲光耀卒氏時年十八思以死殉已而泣曰我之
報徐氏尙不得以一死謝也苦節自守每奉姑餐非自
飪弗進趨子讀書篝燈督課中夜不假寐子爲鵬孫永

蕙永芝皆爲邑名諸生

節舊志
公諱光耀

李來章徐正軒墓表
字正軒世居南陽豐

山之東有隱德鄉黨厭服之稱爲正軒先生云娶馬孺
人無所出又娶王孺人王孺人生爲鵬甫三歲公遂卒
當是時公母于太孺人白首尙無恙王孺人與馬孺人
辟繼業履拮据十指上供甘脆下以其餘購典籍易筆
硯楮墨遣爲鵬就學里塾晚歸燈火熒熒課晝日所授
書誦聲朗朗與紡車織梭相聞也如是者歷十四年所
隆冬大暑不稍輟已而爲鵬入於岸烏巾襦衫稱儒官
弟子員矣王孺人性寡言笑愼起居恒以禮自持嘗書
相鼠之詩申誠家人教子以嚴不事姑息嘗曰氣質有
賢有愚當從幼約束不可任其自然孫有與里中兒相
角者不勝歸而哭訴孺人反重懲之且曰爭起於汝汝
能讓何爭焉其教爲鵬也時時嚴督課之不令晷刻廢

學然憐其馨丁孤苦於屈首伏讀或停毫構思時從窗隙竊視之又未嘗不向壁而自泣也爲鵬稍長當議婚孺人曰吾願得賢孝婦足矣不必貪高門卒聘田氏女善持閫政娛悅遲暮孺人明理道篤信義巍然稱閨閣丈夫南召姬楚石與爲鵬友善遭亂以妻見托孺人論爲鵬曰能全始終方不負良友爲鵬恪遵母訓左右周旋卒保全焉平時喜啖蔬糲若長齋然不佞佛嘗曰渠無功於世而受人供養罪過叢集自懺不暇何能爲人吾死不許隨俗修道塲違者是謂不孝以順治十六年七月十七卒年七十有七爲鵬奉其柩合葬於正軒先生之墓爲鵬生永蘭永蕙永芝永苾甯遠於孺人稱孫者五人曾孫十有八人元孫九人繼此者不知所屆一門濟濟可謂盛矣永蘭甯遠皆庠生永蕙貢入成均永芝又以次膺明經選永芝誠慤端方無毫末近世之君長於予者五歲乃率其子文清侄文彬文蔚表甥方必直門人周其昌熊之鑑等同執弟子禮講求濂洛關閩之絕學於南陽書院汲汲若不及焉豈猶夫世俗之情哉予甚重其爲人故不辭合葬墓表之請而詳爲叙次之且以繼述先志顯揚祖德者厚有望於永芝也永芝其勉之哉

王松生妻武氏松生邑庠生早逝四壁蕭然一子呱呱
在抱武矢死守躬紡績以奉孀姑值隆冬手足俱裂墮
二指鄰嫗有勸其更適者武答曰我緩須臾勿死者特
以姑老子幼甯有他志哉苦守益厲教子言笑皆不以
不苟時稱其節孝兼盡

舊志

錢龍起妻李氏幼知經書曉大義歸錢事舅姑孝及舅
姑亡李脫簪珥裹葬事奉木主設食如生時龍起卒李
年二十九苦節撫孤兒宣族伯欲奪其志李引刀截髮
復斷一指顧宣而泣曰若非斯兒從夫地下久矣宣補

諸生

舊志

李萬慶妻朱氏明崇禎末萬慶以鎮將分防舞陽拒賊
死贈榮祿大夫舞陽城陷朱墜樓死復甦撫庶子可仰
避亂吳楚閒延師督課無虛日後居宛自舞陽遷萬慶
柩葬城南久之家計蕭然咸以爲慮朱願其子若孫曰
吾今日得日覩爾曹家聲不替吾願畢矣窮何傷卒年

七十四

舊志

王沂若妻馮氏沂若文莊公鴻儒五世孫明末馮氏偕
夫避難與賊遇賊掠沂若馮投水漂泊六七里卒不死
撫遺腹子模成立以壽終是時周文獻妻呂氏王守紀
妻曹氏亦以苦節稱呂氏貢生呂

舊志

作李希堯女撫一孤

成立需次州倅曹氏子可起邑庠生

節舊志

周羽明妻馬氏生一女時流寇亂羽明遇害其異母弟之翰甫週歲謂其夫之庶母金曰我輩宜以死殉但周氏僅存此孤微我輩宗系斬矣遂相時遷避獲免于難守節四十八年知縣項亮臣旌之扁曰幽秀晚香

舊志

馬景援女貞姐城內人尹二持刀逼姦力拒之奮不顧身爲尹二所刃頸血淋漓十指俱落奔仆至門而死年二十督學湯右曾題誓死完貞額

旌之

沈瑞鶴等公呈碑

韓盧氏失其夫名夫亡時棺殮難具以厨刀自刎死里

人爲置棺合葬城東

祝萬章輓韓烈婦詩

楊克昌妻張氏父倬邑諸生受徒於家每當講訓輒竊聽默識歸克昌生一子殤克昌卒欲殉舅姑知之使甥女與同寢久之給女異榻一日夜啟窗潛縊於廡柱而死衣履皆密縫時克昌死八月矣張氏未死前三日檢舅姑衣裯盡爲浣濯春米麥數斗欣欣然人不知其將

承訣也

祝萬章張烈婦小傳

田明道妻徐氏農女也醜有力而孝明道以貧屢欲出之姑不許咸豐末明道遠出每負姑避難隨其所至爲鄰浣績鄰人予以食物必遺姑或憐而多予不辭不予亦未嘗乞也後明道歸姑衰冬夜徐氏輒以身爨姑背

使無苦若母女焉

王衍續
采訪

胡應捷妻包氏姑嘗生子欲棄之包氏乳之後卒成立

夫歿貞守壽九十一子恩培官彰德訓導有傳恩培繼

妻張氏亦以節慈稱今方彙采請旌同時彙請節婦

又有行文魁妻張氏事嚴姑能不忤王之貞妻華氏夫

歿無子勸翁納瞽妾生子成立後竟以叔子爲夫後葛

蔚然妻張氏夫歿母家勸改嫁舅姑聽之卒不去翁姑

歿爲鬻奩具治喪王東汶妻張氏子振清從師讀束脩

不給則裂機上布質肆助之單志仁妻張氏姑失明有

廢疾事之孝謹尙居正妻黃氏夫死無子夫弟安利其

財謀嫁之自縊以救免又聞族某謀嫁之乃徧訴於里
之長者挾刃尋某示必死某懼不復謀卒年八十趙長
齡妻曾氏事姑孝姑歿泣絕者再鄰有悍婦亦化之徐
典章妻申氏赤貧子幼乞勺養姑兄欲嫁之誓不至其
門錢樹業妻唐氏事嚴姑能得歡心姑歿子殤叔嗜博
叔婦私意其無可守觸物隱諷之卒以節終趙奉璋妻
李氏奉璋嫂徐弟婦孫姪婦姜俱遇皖匪難不屈死子
錫齡亦被掠不返婦劉氏憂瘵死李氏養老撫孤卒立
門戶年八十張志善妻李氏遺腹生女泣不食意在殉
也翁姑喻之曰節不廢孝爾欲以呱呱遺累白髮乎不

孝則節亦徒然矣遂撫女養親艱苦以歿劉清恩繼妻
韓氏清恩誤聞父死於皖匪馳入賊中殺數人而死韓
氏抱前室子立水中一晝夜賊去翁病悸姑癱事之維
謹凡采節婦二百二十人其割臂療翁姑病者日照知
縣王佐才妻李氏董萬順妻田氏劉漳源妻董氏華紹
鑫妻楊氏凡三人其烈婦有陳宗平妻張氏宗平備作
養母以貧病死逾兩月姑亦死張氏營葬畢於夜投水
死張六柱妻景氏六柱暨母逼作娼不從縱姦人入室
將於夜脅之乘閒自縊死楊允文妻南氏張安道妻丁
氏張本安妻丁氏陳萬善妻王氏鄧新營經制外委魏

廷鑾妻王氏勇張氏陳氏婦俱殉夫死

南氏未死前歸勸嫂善事母張

氏死於墓前陳氏夫爲縣役死無以斂自告鄰嫗願嫁得聘金葬夫葬畢仰藥死

趙吉祥妻馬

氏于金銘妻王氏皆拒姦死

王氏另有傳馬氏以楊保脅姦不從爲所刃右耳右

手俱落逾時死

呂克勤妻羅氏張繩武妻陳氏裴振妻華氏子

景度妻王氏吳小卯妻路氏罵賊死

張氏陳氏死於裕州羅漢山小卯以

鄉團禦匪死

劉恒善妻陳氏許現妻賈氏李芬妻邢氏王尙

德妻張氏陳學易妻投水死

劉抱二子死許聞夫遇害遂死其夫實未死學易妻

失其姓避難周營此若破投濠死

秦曹氏郭氏投崖死

曹氏父步雲郭失其夫姓名

張振都妻閻氏子見遠妻呂氏牛顯五妻苗氏陳玉妻

謝氏張文錦妻閻氏弟文秀妻宋氏文典妻汪氏賈安

瀾妻周氏張廣成妻王氏胡元亨妻張氏投井死

振都官衛

干總攜家避難驟遇賊閻氏及子婦呂氏女八姐孫廣善甥女徐氏同死振都亦以守舍拒賊死謝氏率三女死而諸生樊中萃妻辛氏獨給賊葬其夫而後縊死

賊爲

李好事在道光末

董吉祥妻李氏與女俱以刃刺匪而死咸豐

同治中懼匪辱死節者又有張福女張煥女李龍光聘

妻王蘭女罵賊死賈鵬萬女方學書女生員包蘭枝女

投水死

方女先遇賊遮山拒掠受刃未死聞賊復至遂投水死賈女望賊騎至與祖母暨姑姊妹俱投

水賊過遇救出惟女先投死

高世泰女張文選聘妻周氏女投井死

其未嫁殉夫者有米藹聘妻王澤女周齡聘妻李氏女

黃序穀聘妻鄧氏女史政煥聘妻李連光女王命新聘

妻李氏女其孝女有世襲守備劉承勳女李凌雲女張
有信女承勳死無以葬女哀毀以殉凌雲早死女事孀
母孝母死女殉有信女守貞事親撫弱弟弟亡又撫姪
年七十餘卒而吳鵬若女拒姦死錢文海女以父改鬻
爲妾仰藥死皆彙采待

旌

縣許
册

張大姑蘭金源聘妻童養婿家未笄皖匪至掠金源去
終不歸故蘭氏相呼爲大姑云蘭爲人傭圃貧母家勸
改嫁怒之竟歲不歸省每晨起治畦菜日卓午不休夜
績無燈火則攜紡具逐月明竟以勞折其背晚年高二
尺餘見者憐之卒年五十三童養守義者又有李綱女

未卜吉壻歿父母強欲嫁之遂自縊死魏文德妻勇氏亦童養夫家既婚五日夫溺死姑憐之勸更嫁泣不從姑婦紡績以沒

于烈婦王氏女少頗知書既笄適于金銘初事姑無忤于氏有族子白毛與其姑通而嫌烈婦母家知之欲使烈婦徙近已不可會金銘他出姑與白毛謀強犯之烈婦大罵以死拒白毛怒且懼束烈婦手足於牀斷其舌閉殺之鄰有聞烈婦急號者趨至則已無及矣檢其身喉與下體皆有傷母家訟諸官白毛瘐死獄中其姑亦

旋死

楊欽曾采訪

黃洛晉妻張氏名蘭芬父寶卿官鞏秦道與洛晉父涼州知府崇禮相善崇禮有傳蘭芬幼慧七歲能爲詩歸洛晉善事舅姑嘗命司出納終歲無誤崇禮喜曰不意阿婦治家才更勝於讀書也有悍婦服役見蘭芬所以事姑者久而化之洛晉爲諸生屢試不利蘭芬輒爲詩勉慰懇至洛晉卒寶卿繼卒蘭芬遂以哀病歿有學吟

詩草一卷藏於家

閻受釐采訪

葉庭蘭妻王氏始嫁時葉貧甚王氏能以忍讓和其家舅姑歿夫三弟皆弱撫之若慈母惠子姪維均終其身

葉氏無話諍卒年五十餘

朱霞采訪

南陽縣志卷十二

雜記

自陳寶雉來豐山猿見見諸山經地志前代所記南陽
祥異多矣雜家小說傳疑與信蓋靡得而詳云然其怪
奇妖疴水旱之災諸爲五行志所載史冊具在不可誣
也宛爲名都東漢而後賢士棲遊時有可述流風所被
蓋有曠世而興起者而傳記所載攀援失實亦頗有焉
夫儒術敝而佛老氏興寺觀林立或爲世詬病第觀其
修葺疎數亦可以見風會所趨已嗚呼世事嬗變興衰
相倚縣自前太守莊公改佛寺爲書院其巍然獨存者

惟元妙觀耳謨罕慕德之教亦流而未遠天主耶穌教
晚來其風遂暢南陽九十六保中無慮皆有其徒矣而
枝葉扶疏方興未艾今故總集所得類而記之曰祥異
曰流寓曰仙釋曰寺觀而教堂附焉

祥異

周秦穆公時童子化爲雉雌鳴陳倉雄鳴南陽童子曰

得雄者王得雌者霸後光武起南陽有四海

見漢書搜神記唐書

漢高后八年大水

漢書

更始時南陽童謠諧不諧在赤眉

得不得在河北

文選補遺

建武二十二年九月南陽地震

陷裂人多壓死

後漢書

永元十五年五月南陽大風

後漢書

書

永初七年南陽大饑

後漢書

永壽元年夏南陽大

水後漢書

魏黃初四年三月宛大疫死者數萬

宋書

晉太康六年南陽送

一作

兩足虎

宋書五行志曰此毛

文曰武形有虧金虎失儀聖王應天斯異何為言兆亂也京房易傳曰足少者下不勝任也干寶曰虎者陰精居於陽地金獸也南陽火名也金精入火而失其形王室亂之妖也六水數水數既極火慝將作而金受其敗也至元康九年始殺太子距此十四年二十七十四火終始相乘之數也自帝受命至愍懷之廢凡三十五年

震宋書

永甯元年七月南陽大水

宋書

十月南陽霖雨

淹害秋麥

宋書

義熙十二載涑陽獲銅車輪於涑水

治

記義熙十二載清陽縣羣童子浴於清水忽見側有錢如流沙因競取之手滿放隨流去又以衣盛裹各有所得又見流錢中有一銅車小牛牽之勢甚奔迅兒輩奔逐掣得一輪徑可五寸豬鼻轂有六輻通然青色缸內黃脫狀如恒運於時沈傲守南陽求得此物然莫測之

宋大明元年七月辛亥白雀見南陽宛獲以獻

宋書

五

年白麀見南陽 七年正月庚寅又見九月癸未又見

宋書

魏景明三年四月南陽宛縣木連理

魏書

周保定二年南陽獻三足烏

北周書

唐天寶十四年秋二龍鬪於南陽城西

唐書

至德二載

正月丙子南陽有白虹四上亘百餘丈

唐書

三月南陽

有雀巢於城門砲礮石上三雛成乃去是月有二蛇鬪

於南門外一蛇死一蛇上城

唐書

四月南陽白霧四塞

唐書

宋建隆三年有象至黃陂縣匿林中食民苗稼又至安復襄唐州踐民田遣使捕之明年十二月於南陽縣獲之獻其齒革

宋史

金興定元年南陽大水

金史

四年南陽大水

金史

元世祖至元二年五月乙卯南陽大霖雨自是日至六

月庚申乃止

圖書集成

十月南陽大水

圖書集成

九年九月

南陽淫雨河水溢地田廬害稼

元史

二十九年閏六月

南陽饑

元史

大德元年六月南陽大旱民鬻子女

元史

四年南陽蝗

元史

五年南陽蝗

元史

六月南陽旱

元史

七年六月南陽白河潦河皆溢

元史

至大三年八月己

巳南陽蝗

元史

四年南陽雨雹

元史

延祐六年南陽大

雨水

元史

泰定四年五月丁卯南陽旱蝗

元史

十二月

南陽蝗

元史

至治三年南陽蝗

圖書集成

天曆三年五月

南陽蝗

元史

至順元年五月南陽蝗

元史

順帝至元二

年五月乙卯南陽大霖雨自是日至於六月甲申白河

大溢水爲災

元史

明永樂四年南陽獻瑞麥

明史

五年南陽麥秀兩歧間

有三五六歧者

圖書集成

宣德五年七月南陽山水泛漲

衝決堤岸漂流人畜廬舍

明史

正統六年秋南陽蝗

明史

天順四年南陽雨自五月至七月淹禾苗

明史

成化

二十二年三月甲寅南陽雨雹大如鵝卵

明史

正德六

年冬南陽桃李華天鼓鳴地震

圖書集成

嘉靖元年正月

朔南陽地震有聲

圖書集成

五年七月南陽牛產犢一首

兩身

明史

七年南陽蝗大饑人相食

圖書集成

三十四年

十二月十四日夜分南陽地震有聲從西北來響如雷

轟及辰猶震數日不止

圖書集成

三十五年十二月南陽

地震有聲

圖書集成引河南通志

六三十七年南陽地震

圖書集成引大

政 四十二年南陽雨粟豆蕎著地能生牲畜不食

書 集成引河

隆慶二年四月癸未南陽地震

明史

萬曆

三年南陽地震

明史

二十一年南陽大饑

明史

二十八

年三月南陽火延燒唐府

明史

三十九年南陽雨黃灰

圖書集成

四十三年南陽蝗食禾

舊志

四十七年南陽蝗

食稼蝻徧野

圖書集成

崇禎九年南陽大饑有母烹其女

者

十二年南陽蝗草木盡食數百里如霜

圖書集成

志十二年蝗食稼歲大饑始則飛蝗如雨既而蝻結塊數十里並排而進自北而南山河城垣無阻達井則自井口至底而上草木無遺人家室中箱籠衣服盡蝕論者為流賊陷城上賊食人之兆

十四年

五月南陽大風拔樹

明史

是年雞入夜而鳴犬人立而

語逸圍外編 又云先是異徵疊見無論乘城之夜四
望賊火遠近不斷城內地方幾何未一年屢次火逸
動延數十家予時猶在城舉目視屋上咫尺白氛淪淪
動人有從野外來云見城郭白氣包裹如團晨起見東
北黑氣一股自城外來近人家屋上浮浮西南去城近
中人家屋牆根膿血溢掘之無物其溢如故唐王晨起
禱神儀仗多矣鬼哭其前令後趕打猶緩緩去久之始
沒城陷後西三十里外人夜出聞有數萬人聲自東來
因伏地遙望車載者步行者執燈
籠者語呼扯攜攘攘往西南去

國朝順治十六年南陽先澇後旱大饑斗米千錢民多
鬻男女文武官捐俸捨粥全活多人 十七年夏五月
朔二日南陽地震自午至亥是日大雨如注水盈數尺
民間室廬垣牆多傾

康熙三年大有是歲夏五月六月霖雨不止民間禾麥無

志 十一年秋八月十六日隕星大如斗自南而北墜
地有聲火光甫滅遂有青煙蜿蜒天半移時方散 十
五年夏五月大水清河潦河暴漲近岸居民廬舍湮沒
城南舊築隄障潰決數十丈波面漂流多男女 十八
年南陽饑發帑金賑濟是年四月十七日雨雹傷禾稼
二十六年夏五月二十六日雷電作大風拔木 二
十八年粟穀秀雙穗 二十九年牛疫死經年不止積
骨遍野田多荒蕪是年冬十一月二十九日大雨雪井
泉凍至次月初六日風雪交作深至丈許民有凍死者
三十一年歲大祲民間瘟疫秦晉之民流亡南陽死

者無算 四十二年大饑民剝樹皮掘草爲食有饑死者賣男鬻女不計其數

雍正二年二月日月合璧五星連珠會於姬訾之次
十一年大有麥秀兩歧

乾隆十四年清水大溢平地水深數尺禾稼屋宇漂沒
殆盡民有巢棲者上憲題奏發穀賑恤 三十九年大
有 五十一年春大饑人相食夏大疫死者無數秋蝗
食禾殆盡

嘉慶八年夏麥秀兩歧 十八年春夏亢旱大饑六月
始雨多種蕎麥八月隕霜殺蕎民間取蕎花食之又多

染疫

道光元年夏四月日月合璧五星連珠 十年閏四月
二十二日地震 二十六年旱野間每夕火光四起近
視則滅村閭終夜不安者累月至六月夜大雨後始息
咸豐七年春大饑 六月飛蝗蔽天食禾殆盡 七月
蝻生遍野食秋稼 八年五月飛蝗入境 九月彗星
兩見一西北方一東北方光芒長數丈闊數尺射入北
斗 十年五月彗星見西北方

同治元年蝗食秋稼 七月十七日夜眾星向西南疾
行如矢甚夥 二年六月有妖如熊夜見不傷人俗呼

爲馬頭 三年正月初五日夜四野火光零亂城闕惶
恐鼓譟鉦鳴云過鬼兵 六月大風雷雨批毀房屋大
木斯拔 五年夏四月石橋大雨雹傷麥禾瓦屋擊碎
大者重十五六斤 七月初五日戌刻雷雨大作震斃
一人一牛 八月初一日日月合璧五星連珠 九年
夏四月有紙人剪髮重者至死輕者昏迷復剪雞翅振
翼而死 十年秋天雨蕎菽其形甚小紛集道旁 十
一年冬大寒樹多凍死 十三年五月朔日有食之晝
暝恒星畢見

光緒三年大饑人多餓死鄉民遠逃村落空虛 詔發

倉穀賑饑緩徵本年錢糧 五年五月初六日地震

八年彗星曉見東南方長丈餘色微赤直射參宿 九

年十一月夜流星彌天四面墜落 十一年九月太白

經天 十八年十月將晚空際有火光如炬自西南而

東北火墜光滅餘煙蜿蜒經時不散隱隱有雷聲焉

十九年五月十四日夜火藥局災 二十年秋多火災

有火如彈丸觸屋卽焚人不及防甚有一夜數家火起

者逾月始息 二十四年夏大水 二十五年秋蟲食

稼 二十六年夏旱 二十七年正月十九日大風

二月初九日風霾竟日 二十八年八月初三日雨雹

流寓

漢諸葛亮

見祠祀

鮑出字文才新豐人興平中三輔亂出母爲賊所略出
獨追斫賊數十人得母還遂相扶持客南陽建安五年
出北歸而其母不能步行兄弟欲共輿之出以厯山險
危乃以籠盛其母獨自負之鄉里士大夫嘉其孝烈

唐吳筠魯人下第居南陽倚帝山後徵待詔翰林

新舊唐書

李白字太白嘗客南陽與崔宗之詠歌爲樂

太白集憶崔郎中宗

之遊南陽遺吾孔子琴撫之潛然感舊詩昔在南陽城
唯餐獨山蕨憶與崔宗之白水弄素月時過菊潭上縱
酒無休歇泛此黃金花頽然清歌發一朝摧玉樹生死
殊飄忽留我孔子琴琴存人已歿誰傳廣陵散但哭却

南陽縣志

卷上

雜記

流寓

八

山骨泉戶何時明長掃狐兔窟

又有南陽送客詩

宋尹洙字師魯河南人也徙監均州酒稅得疾無醫藥昇至南陽求醫疾革憑几而坐與賓客言不及其私顧稚子在前無甚可憐之色卒年四十有六家無餘資客

其喪於南陽

歐陽文忠集

東都事略

蘇子美哭

尹師魯云棄局奔南陽後事得所託

金郭宣道字德明邢州人貞祐中客南陽時定興張履坦罷鄧州觀察閒居南陽之石橋見德明愛之招致門

下飲食教督遂有聲場屋閒正大末沒兵中

中州集

胡德新河北士族也寓居南陽往來宛葉閒嗜酒落魄不羈言禍福有奇驗正大七年與燕人王鉉邂逅於葉

縣村落中與鉉初不相識坐中謬以兵官對胡曰此公
在吾法中當登科甲何以謂之兵官眾愕然遂以實告
二人相得甚歡卽命家人具雞酒以待酒酣舉大白以
相屬君此去事業甚遠不必置問某有所見久不敢對
人言今欲告子遂邀至田野密謂之曰某自去年來行
宛葉道中見往來者什且八九有死氣今春至陳許間
見其人亦有大半當死者若吾目可用則時事可知矣
鉉驚問應驗遲速曰不過歲月間耳某亦不逃此厄請
密誌之明年大元兵由金房入取峭石灘渡漢所過廬
舍蕭然胡亦舉家及難其精驗如此

元史

李汾字長源平晉人爲人尙氣跌宕不羈性褊躁觸之輒怒喜讀史工詩金季上書言時事不合去客唐鄧問恒山公武仙署爲行省講議官旣而仙與參政色埒相異同謀自安懼汾言論欲除之汾覺遁泌陽仙令總帥王德追獲之鎖養馬坪

在今南河店南

絕食年未四十而死

金節

史本傳

元孝朮魯遠字明道文靖公子以廕作祕書郎轉襄陽縣尹須次居南陽賊起遠以忠義自奮傾財募丁壯得千餘人與賊拒戰俄賊大至遠遇害其妻雷爲賊所執欲妻之詆賊曰我參政冢婦縣令嫡妻夫死不貳肯從

汝狗彘生乎亦見殺詔並加褒卹

元史

閻俊字灼三元中書左丞以直諫謫南陽百戶遂家焉
後蒙賜藉田得貲輒以調貧乏設教里閭絕意仕進

閻頤碑

碑

明張唯本永豐人流寓南陽洪武六年以尙書舉第一
是年上開文華堂於禁中詔擇解額內雋異者肄業其
中唯與選正月甲寅命題賦詩稱旨擢編修詔贊善大
夫宋濂正字桂良等教之上謂曰昔許魯齋諸生多爲
宰輔卿其勉之萬幾之暇輒幸堂中取其文親評優劣
命光祿寺日給酒饌濂輩雖司啟迪願諸生皆上所親

教不敢以師道自居一日侍燕間詢及諸生肄業進益
濂對曰無如張唯者因備述其雋才請錄爲弟子員上
笑而許之三月上命唯等各歸展墓皆攝監察御史以
行尋還任

中州人物
考通志

新野王府輔國將軍宇浹五歲喪明從師掌識文字而
耳受書久之博通羣籍熟習國家典故旁通太乙壬遁
百家之學辨識古器以手摩之卽解唐成王以摩天王
目之子奉國將軍宙松力舉千斤好劍任俠宙松子鎮
國中尉碩爨字孔炎博雅慷慨勤學工文與其子輔國
中尉器封並以文章名海內號南陽公子萬厯中吏科

推舉諸藩文行堪爲宗正者於唐則首碩燼父子各有

詩集行世王世貞甚推重之器封字子厚著宛志附

巢園集

明外史明詩綜

與內鄉李蔭相倡和

李蔭諷子厚病詩念爾恒多病迢迢

槍我情定知詩作崇奚翅酒爲醒花遲巡檐色營流伏枕聲可堪風雨夜蕭索對青萍

國朝楊守志 郟縣人明季從事戎行授都關不就播遷

於宛遂家焉爲人慷慨好施予里中有稱貸者守志憐

其貧遂焚其券每歲歉出粟賑饑施榻榻以待路殍至

於傾囊家人患貧微止之守志妻李氏曰苟能利人何

妨損已但行之勿中變也子緒震邑廩生

舊志

苗芝洛陽人明季闖逆播亂人盡竄徙芝父景成忽失

所在芝冒險阻尋查已而得其父於井中不死芝負其
父命妻掖母劉氏南行至南陽遂家焉芝性至孝因家
貧無以奉親乃設家館於西門內人感其孝來學者眾
館穀頗豐菽水得以無缺父母悅之俱以壽終

舊志

郝光斗字奎垣潼衛人順治初僑寓於宛善詩著有屏
山堂詩集藏於家子振翼爲邑諸生

舊志

李玉琳新安人康熙辛未歲大饑玉琳兄弟方謀奉母
就食會洛陽歲試玉琳乃留試遣弟玉珩負母赴南陽
去試竣持七十錢星夜奔跡抵南陽之梅林鋪音問渺
然值日暮計窮情急乃坐道旁呼天大號曰我新安李

某也尋親至此已八百里足繭囊竭而親不可得獨有
死耳益大號哭有倉皇來前者卽玉玠也玉玠已爲士
著延作塾師坐間忽心動若有迫之者曰起汝兄至矣
急出戶聞號聲乃前與玉琳相持歸

中州文徵

王允昌字愚菴先世山陰人父德鳳遷南陽遂家焉允
昌博學好古兼善 國書自平陽參將再遷至夔陵鎮

總兵所在有聲告歸卒遣官 賜祭允昌雖以武功顯

然謙謹自牧嘗構益恭堂以示志故子孫恂恂多以學
行見稱子之琦字璞田仕至漳州府知府之瑛副貢生
之瑛子河字積遠由蔭遊憲官監察御史奉天府府丞

家終桂平梧鬱道

廣西通志

自允昌至之琦雖家宛猶籍山

陰之琦孫元位始以南陽諸生中甲戌進士知東明縣元位卒家落譜牒散佚其治行無有能述者矣

張心一字定齋寶豐諸生嘗遊宛客知縣吳鴻詔貧而好學耄年不倦嘉慶辛酉恩賜進士翰林院檢討再赴千叟宴加國子監司業銜

李苾字孝欽號潔菴順天人父正芳官至鎮寧副總兵致仕居南陽爲族譜以睦宗人卒年七十餘祀許州名宦苾由蔭生任奉天通判遷戶部兵部員外郎郎中授四川兵備道歷山西糧驛雲南鹽法分巡辰沅永靖道

以卓異擢雲南按察使轉廣西布政使未之任改河南
苾所至皆有政聲在河南數年卒官祀開封名宦

李氏家譜

仙釋

趙顏南陽人管輅於五月行至南陽平原見顏在田中
刈麥嗟嘆之而過顏問曰老丈有何失而嘆聲若此輅
曰吾適見汝壽不過二十所以嘆也顏聞其言叩頭請
救輅曰命在於天非我所能救也遂去顏奔告父父遂
追輅數里及至下馬拜曰適聞小兒之言祈聖人爲延
其命終當報之輅曰命不我與爲之奈何然子懇誠且
爲救諸子且歸家覓清酒一榼鹿脯一觔吾即以小食

時必至君家後果依時而至語顏曰汝卯日割麥地南
大桑樹下有二人圍棋汝將此脯酒往一邊酌酒致脯
於地他自飲之飲畢便斟以盡爲度若問汝汝但拜懽
勿言也必有人救汝乃依輅言而往果見二人圍棋顏
遂致酒脯於前二人且戲且飲酒食脯若不知顏之在
旁飲已戲終北邊坐者舉首忽見顏侍立大怒叱曰何
故在此顏伏拜而不言南面坐者曰適來已飲他酒脯
可無情乎北坐者曰文書已定不可輒易南坐者曰取
文書看之見顏十九歲語曰易矣可改之乃取筆挑九
字於上語顏曰今汝活九十年顏喜不自勝拜而歸輅

曰北坐者是北斗注死南坐者是南斗注生凡人受胎皆南斗過北斗所有祈求皆向北斗矣輅遂去顏父備東帛鑑金謝之一無所受

後漢書注

李先生名曠字祖和南陽人劉先王遣軍取先生先生起霧半天備騎自相殺先生乃入吳

人物志

柳融字若童號無極真人生南陽修道於終南山葛仙傳曰皇極子康熙三十有六年憑徐子美璜降乩於僉憲李諱言之署齋雅擅詩文發明道德撰度世經三卷理晰精微皆正心誠意之學客有以世事休咎來問者則曰設壇以談道非爲異代卜筮且矜奇異以示人也

諱言爲之記節舊志

馮亮字靈通南陽人梁平北將軍蔡道恭之甥也少博覽諸書又篤好佛理隨道恭至義陽會中山王英平義陽獲焉英素聞其名以禮待接亮性清靜後隱居嵩山感英之德以時展覲英亡亮奔赴盡其哀慟宣武常召以爲羽林監領中書舍人將令侍講十地諸經固辭不許又欲使衣幘入見苦求以幅巾就朝遂不强逼還山數年與僧講誦爲業蔬食飲水有終焉之志會逆人王敝事發連山中沙門既而亮被執赴尙書省十餘日詔特免雪亮不敢還山遂寓居景明寺敕給衣食及其從

者數人後思其舊居復還山室亮既愛山水又兼工思
結架岩林甚得棲遊之適頗以此聞宣武給其工力令
與沙門統僧暹河南尹甄深等同視嵩山形勝之處遂
造閑居佛寺林泉既奇營製又美曲盡山居之妙亮時
出京師延昌二年冬因遇篤疾宣武敕以馬輿送令還
山居嵩高道場寺數日卒詔贈帛二百疋以供凶事遣
誠兄子綜殮以衣帽左手持板右手執孝經一卷置尸
盤石土去人數里外積十餘日乃焚於山灰燼處起佛
塔經藏初亮以盛冬喪連日驟雪窮山荒澗鳥獸幾窘
僵尸山野無所防護時有壽春道人惠需每旦往看其

屍拂去塵霰禽蟲之迹交橫左右而初無侵毀衣服如
本唯風帽巾又以亮識舊術方法師信大粟十枚言期
之將來十地果報開亮手以置把申經宿乃爲蟲鳥盜
食皮穀在地而亦不傷肌體焚燎之日有素霧蒼鬱廻
繞其旁自地屬天彌朝不絕山中道俗營助者百餘人

莫不異焉

北史
本傳

張路斯南陽人也初家於潁上縣仁社村年十六中明
經第唐景龍中爲宣城令以才能稱夫人石氏生九子
自宣城罷歸常釣於焦氏臺之陰一日顧見釣處有室
樓殿遂入居之自是夜出旦歸輒體寒而濕夫人驚問

之公曰我龍也蓼人鄭祥遠者亦龍也與我爭此居明日當戰使九子助我領有絳綃者我也青綃者鄭也明日九子以弓矢射青綃者中之怒而去公亦逐之所過爲谿谷以達於淮而青綃者投於合淝之西山以死爲龍穴山九子皆化爲龍而石氏墓關洲公之兄爲馬步使者子孫散居頰上其墓皆存焉熙甯中司封郎中張徽奏乞爵號詔封公昭靈侯石氏柔應夫人

歐陽修集古錄

陳永伯南陽人得淮南王七星散方試合服之二十八日忽然不知所在永伯兄子名增族年十七亦服之其父繫其足閉於密室中晝夜守之滿二十八日亦不知

所之本方曰服三十日而失其所在後人不復敢服云

神仙傳

徐道季南陽人少住鵠鳥山靜悟道真數年不懈張真人憐其誠謂曰夫學道者當巾天清詠大曆跼雙白徊二赤此五神道之秘術也大曆者三皇文是也道季遵修之後竟成道

人物志

張虛白鄧州南陽人通太乙六壬術留心丹竈遇真人得秘訣宋徽宗聞其名召管太乙宮恩賚無虛日官太虛太夫金門羽客出入禁中終日論道無一言及時事曰朝廷事有宰相在非予所知也金人尤重之以爲神

仙忽一日曰某年月日吾當化去至期果然

宋史

喬大遷博望保人性豪放未嘗讀書縱酒賭博畋漁無所不爲中年頓改前行習醫學雖不識字頗精方術遂賣田產購藥物爲丸散濟人不求所償見道路橋梁損壞祠廟傾圮者輒募緣修之如此者二十年覺神色精采氣度安雅儼然道德氣象卽嘗學問者無以過之晚年鶴髮童顏南華道德無不徹其要妙年七十餘歲端

坐而逝

舊志

呂道人本姓李田野農家子也一日夫婦在田遇異人授以五行星命之術自此遂精於卜言人吉凶禍福天

時旱澇陰晴皆如其言忽一日夫婦俱失明遂以賣卜
爲生每行夫婦俱不言姓名自號爲呂道人崇禎辛巳
春唐藩召入歸言於素善徐子爲鵬曰吾至王府及各
宦宅檢諸貴造皆係死運吾因占南陽休咎今年冬必
有大災吾亦不逃此數子家世綿衍今以語子可謹避
也至十一月初四日李自成遂陷南陽城中屠戮唐王
遇害諸大姓無有存者其精驗如此

舊志

邵道不知何許人從事老子學游於南陽順治九年大
月大旱禾苗枯百姓驚皇有司跣足禱雨不應邵詣府
縣請禱設壇南郊並置柴數百梱自言三日不雨請焚

其身越三日無雨邵遂入柴自焚甘霖立沛數百里官
民爲立祠南郭今白河吞沒

舊志

瘋僧號悟雲自言明崇善寺僧也崇禎末寺燬於寇僧
眾遇害瘋僧獨逸事定日佯狂市廛誦經抄募睫毛長
指許叩其姓年幾何不答與以酒食錢粟家貨必倍售
以是遇其來輒施以錢或有過門不入者雖招與之不
顧也科頭赤足無骯髒異味沍寒時身衣衿衫以破絮
纏兩足日至白河中濯之曳冰而走琤琮有聲以爲樂
乞錢沽酒飲輒醉餘錢置道旁牆隙中閒與人言禍福
多奇中以故時人益重之先是山陰陳春源素相識一

廿忽詣與承訣陳妄應之是夜果於北關外紅廟西廊
下玉筋雙垂合掌端坐而逝眾市棺衾爲斂入斂時忽
然啟眸瞬息合閉既舉棺輕若無物蓋尸解云春源爲
塔葬之

張宗璿號耕雲福山人咸豐中至南陽爲元妙觀道士
開敏善交遊嘗獨力捐築北關砦助官守又集其佃車
應軍役以功得 頒道藏全經

傳壽形藏
經閣記

光緒初大饑

宗璿復爲粥以食饑者人多稱之卒年八十

濮文暹張
耕雲龔塔

銘何家琪
張道士傳

張仙姑南陽人莫詳其所以人有疾仙姑輒瞑目潛爲

布氣攻之俄覺腹熱如火已而鳴聲如雷雖沉痾者無

不愈宋徽宗嘗召至東都後不知所終

統志一

王氏生員王家連之姑也適周姓會崇禎末世亂周姓
舉家盡歿王遂依母家別構草房三間供佛像持齋誦
經終夜打坐不寐一切香火燈油衣服食需皆出績紡

易之雖母家所遺亦不之需也如此者三十年一日忽
將佛像及平日所誦經盡焚燬之惟設香爐焚香靜坐
人問道術但指心以示默無言也問與人言禍福無不
奇中又十餘年一日集其母家族屬曰吾某日某時去
及期果如其言越三日復生但聞痛哭聲眾驚視之言

未及哭聲不已曰吾視此軀殼如糞穢聖眾以我有口
過復遣回自此並不與人言禍福至康熙二十一年十
月初十日告其母弟希義任從周等曰吾今日去也去
則不復返矣可瘞吾於夫塚旁離三尺許須臾端坐而
去時家連應考在府場完急歸視之已四日矣啟其龕
見其端坐微笑面目如生依其言葬於其夫周姓塚旁

舊志

寺觀則有彌陀寺在延曦門外晉永昌三年建

一統志今

爲宛南書院

文殊寺在城南中雷保唐貞觀二年建

舊志一統志
云在城東南唐

貞觀二

年建

東嶽廟在城東宋雍熙四年建

明何洛文新建前軒記曰庚寅春三月不雨畿

輔內外及秦晉齊淮南河間方數千里赤旱土龜坼二
麥幾槁諸泉源涸不流漕河蜿蜒一綫運艘淤阻列狀
以聞請故事遣臣禱於東嶽秦岱之神期獲甘澍無憂
我穡人而所在有司擇其神合祀典者祀之不次獲靈
應云南陽固有東嶽行宮出延曦門折而北里許其地
帶陽負陰環流列蔭稱幽勝之區而神殿宏敞廟貌孔
赫重垣周廡羽衣黃冠廿輩司視事歲時民間香火不
絕蓋創修自唐府先代而歷增飾之益鉅麗焉殿之前
際地一區諸焚修者恒露立糴拜其上遇驟雨積雪無
避伏處卽神像亦爲風日剝蝕議者謂規制狹隘未稱
也中卿承奉正安君臻見而發心捐資若干獨任其成
命工庀材建層軒兩楹於殿宇末罄然爽塏煌煌觀美
植府侯霑化李公芳率僚屬秉虔徒隴乞釐神所縣侯
光化陳公大道倣漢董氏春秋繁露所載於廟東隅擇
地令里老行之如期獲滿田野霑足羈人士無不更舞

南陽縣志

卷七 雜記

三

惟歸功於神競持脯酒饗讌而新軒適落成李侯因命
巫雩祭以答靈貺焉安君乃走一介遠乞余記其事余
嘗副秩宗員考君三禮甚悉按泰山一曰天孫言爲天
帝孫也又曰岱宗東方萬物始交代之處爲羣岳長也
古者七十二君受命必秩而祭焉蓋其神吐納百靈育
成萬品功德於民甚著秦漢以降郡縣皆立祠堂加王
爵宋元加帝號至我太祖下詔始釐正之每歲春以神
從祀南郊仲秋遣守土官致祭而一切通都大邑遐陬
僻鎮有爲行宮祀神者聽民便勿禁故所在禋祀特隆
而早潦祈求特驗要之皆精神相爲感格而已公羊春
秋日觸石而出膚寸而合不崇朝而徧天下者其泰山
之雲乎則神之施澤溥而獲報豐也素矣往安君給事
掖庭余出入中秘雅相善其人軒朗練達多交縉紳名
流間而出輔藩府尤勤勞蠲潔好施與不吝聲稱噴噴
起宛中而李侯溫恭淵塞其僚同寅協贊與陳侯明敏
誠篤皆有惠致於民是役也其需神貺若響應而慰人
望如饑渴良不偶也余伏在鄰封樂觀厥成爲之記如
此異口者天子報功告成講求歷代封禪之典則金簡
玉策必有炳耀不朽者余不佞竄
草莽其何知焉又有王鴻儒記

興國寺在城南中雷保宋至和元年建

舊志今日上元寺在城西南

三十五里下范營有明方九功記

鐵佛寺在城北上石堰東北宋元祐三年建

一統志舊志作

真祐

鄂城寺在縣北五十里西鄂城

舊志有宋元符二年造石獅子記金王元稹有

登鄂城寺樓詩

竹園寺在縣北四十里舊名丹霞下院

金元好問丹霞下院同仲澤玉

鼎賦詩云鞍馬忽忽去復還霜鐘今得見豐山千年香
火丹霞老滿眼興亡白水閑壯志自憐消客路深居誰
得似禪關只應頻有西來夢夜夜青林杳靄間王渥詩
云霜落豐山白水收歲華全在竹園頭賦詩鞍馬慙真
賞載酒林泉阻勝遊野色自隨人意遠夕陽應
為鳥聲留仙源回首旌旗隔一笛西風喚客愁

太乙觀在縣西南二十里本名衡山廟金貞祐二年敕改爲觀有十八里路修醮碑

高明菴在博望金正大四年建

觀音寺在清陽門外小東關元至元三年建

通志

元妙觀在城北關元至元中建明唐藩重修

有唐成王題觀額

國朝雍正八年頒

內殿佛像一並慈雲法雨額同

治六年頒大藏道經

有傳壽形南陽元妙觀藏經閣記同治六年夏五月禮臣以河南巡

撫轉據前知南陽府事傅壽形請

頒道經全部於南

陽元妙觀表羽士張宗璿守城功上

聞得旨允行

冬十一月宗璿走京師奉經南旋以七年秋九月命工

經始築閣於觀藏經於閣壽形適兵備南汝因爲文授

門人汝州許靜書而勒諸石曰

先皇帝之十年冬

壽形解北援兵將復守宋撫臣以淮寇西駁薄汝賴問

南陽據荆河上游徵壽形據其郡至集郡父老爲守禦
計城西北地曠民亦尠東南殷且庶無以濟其守予儼
以釁非計也郡人崔懷玉告曰有宗璿在無慮此明年
二月寇至自唐西入郟自鄧旋宛波清水而東歷四十
餘日壽彤率郡人擊以礮宗璿與焉又出其道眾數百
人雜伍保中晝夜屹立無倦容且知緩急識進止善拊
循匪獨能用其眾凡所建言郡中人均樂從之故卒使
城無可乘之釁守以固民以安始信懷玉言非偶然宗
璿誠非尋恒羽流也寇退謀所以善其後者宗璿進曰
城東南無郭西北高阜崇隆瞰城中如繪二者皆不便
於守惟若爲宜壽彤避之旋受代去代者亦避之議甫
定粵逆陳得才自潁來犯必欲下宛爲進取商洛計拒
楚豫援師圍攻十餘日會襄陽道金國琛率兵來援城
中人亦截其所開地道得才遁去今上紀元秋
七月事也都人士相謂曰若若成焉至是於是益以宗
璿議爲然合力興作閱歲工將竣壽彤奉命再守此
邦迺進宗璿暨都人士重爲規畫補所未竟環砦而樹
礮臺者十有六樓櫓器械罔弗備自是以來寇屢至屢
不得逞砦之力亦宗璿力也都人士請於壽彤欲有以
懋其功辭弗受眾固強之因請賜經以寵其廟而壽

形移開封不果旋以憂去後知府事張仙保上其事又
 格於吏議者再五年九月壽彤服起官於汴迺為書上
 撫臣曰宗璿之有勞於南陽其一也然則是舉也非為經也為宗
 璿也非為宗璿之勞非一人也然則是舉也非為經也為宗
 民天下之民也南陽之民之心天下之民之心也一舉
 而獲天下之民之心聖人在上宜無有不報者撫
 臣曰善遂為之請於所司故事惟龍藏經得外給所司
 者援以請且曰廟功也詔果報可按道家言經始上
 清次靈寶次洞明謂其出於龍漢赤明開皇之初者史
 佚無徵不可得聞歷漢及唐至於元明代有著錄更相
 釐定統以洞者三次以轉者四別以類者十有二析以
 函者五百十有二弟以卷者五千四百八十有五海宇
 流傳歷有年載速入我朝不以行於天下蓋不欲崇
 尚元教致夷民行也今以宗璿故而迺順守吏之請允
 部臣之議舉國家二百餘年未嘗印給之經冊出自
 抑亦見上方藏於外郡甯惟方士微勞因是以垂於無窮
 告於觀為羽流叢林園亭之盛甲於一郡西北園記曰
 來者

光緒辛丑夏余罷豫撫養病南陽聞府城北關元妙觀
規模宏肅爲豫中西南一大道院暇日攜友人胡敬菴
子翰薦孫重熙往游蟻謁雲道士祥瑞延余於觀之西
北園時荷花盛開魚鳥親人余游而樂之前後凡數至
道士款洽甚殷出其所藏古今名人字畫甚富又雅善
鼓琴當盛夏亭午爲余鼓一二曲泠泠然有絃外之音
因復於余曰公樂此園而游焉請爲序可乎余應曰諾
夫觀之緣起廢興前人具有記載予不復贅西北園者
舊有基經道士擴而大之其前爲五桂堂堂後因園鑿
池廣袤數畝復以周廊環以曲欄栽荷種魚聚石爲山
架亭其上名以浣香倚亭東望翼然臨水者藕花榭也
隨山西降穿石徑渡板橋數武得精舍三楹舊名環翠
余謂不足以侈其勝取謝康樂之句題以清暉由精舍
南行折而東跨以石梁上復長檐可以左矚右瞻瀾瀾
乎有濠濮閒意道士求余書濠上二字以顏之過石梁
南數十弓右折向北有石臺橫出水中所謂月臺也作
室以待棲息每當夕陽西下清風徐來池水微波萬荷
攢動疏樾洞達虛白四映如放舟中流飄飄然不知所
止額曰秋香畫舫由畫舫向後旁出側折沿石磴登假
山上覆茅亭與浣香亭相望下臨月臺名以得月坐亭

中望平疇廣陌農人作息之景歷歷在目而遠近諸山
則皆如拊其背而摩其頂圍之勝大略於是而具是可
記已雖然余所取於道士尤有在焉道士故家陝西回
匪之亂闔門殉節年十七隻身依多忠勇營忠勇奇之
命率親軍馬隊身經數十戰手刃父仇積功游游擊忠
勇卒於軍遂棄官變名入嶗山學道已復游吳楚燕豫
閒逾海游奉天棲太清宮入都居白雲觀至光緒乙酉
始來南陽因留居焉余聞而悲其遇哀其志也道士顛
沛抑塞至此其亦可以徜徉以沒世矣而道士不然觀
中聚食眾常至百餘人踵前人之緒而益加謹以故少
長有禮進退有序肅肅穆穆行其庭闈無所聞觀田隙
地教樹果木皆親遺之遠方而不取租值日以惠農佃
也考古人區田法并歷試畫井下種糞養諸式刊行於
世曰以備水旱也歲歉常集工作來役者多予其值而
不計其工陰以賑農民之乏食者始至設義學三塾爲
之擇師時親省視至今不倦上年北事起修園練圃助
官紳所不逮至於自奉極儉而待客甚豐蔬菜必潔而
禮意倍勤凡此皆播紳大夫之所難而方外毅然爲之
嗚呼殆所謂存心於愛物必有所濟者歟斯園特其寄
焉耳昔朱子記崔君嘉彥西原菴許其爲人而重歎其

既老無所復用於世今道士所爲不幸同於崔君而余
寄居林下坐惜道士不及爲國家擁旄建節立功萬
里而以黃冠老也因太息而爲之記黃冠行住動數百人爲京師西南
道觀之最

白馬寺在縣北石橋保元至元十二年建舊志

丹陽觀在縣東南元申州軍民屯田總管馬忠增建今

曰玉皇廟有元大德元年重修碑

洞元觀在縣北五十里石橋北元建今廢

龍興寺在縣南四十里禹王店元建有明王鴻儒記

高真觀在清陽門外迤西明初唐藩創建宏治閒又建

七寶樓高逾城雉國朝同治元年粵匪圍城穴樓置

礮擊城上人多死者圍解知府金梁命折毀之

泉莊寺在城南

有萬厓
重修碑

三官廟在魏公橋北明建

有邑人陝西苑
馬寺丞郭昇記

崇善寺在永安門內明唐憲王奉敕建

一統志謂至
元開敕建誤有

明成化時編脩曰曰記略言正統戊辰欽賜唐園佛大
藏經典成化丙戌請額製賜曰崇善又有正德庚午紀
善朱瑾
重修記

地藏寺在城東關公議門外

有明唐成王石刻
心經并不刻佛像
順治中

總兵張應祥重修

有守道戴明說
記戴王繪行書

嘉慶元年楚匪北犯

知縣周書升毀寺門爲壘石寺遂荒廢

宋志
稿

柏通寺在縣東北四科樹

有明成化
重修記

卧佛寺在縣治北康熙十年建

魏兵柯鐸建有邑人魏寅采重修記

甘露菴在東關留餘橋南康熙二十一年南陽總鎮周

邦甯建

縣中寺觀之類又有薄太后廟

在城東南魯桑園有明碑

張真人祠

在東關

三元宮

在博望北

藥師菴

在縣治北康熙二十二年建有康熙

中禮部侍郎李仙稷記

淨土菴

在北郭外

廣福菴

在召杜祠北

長禪菴

在縣西南

七十

清涼寺

在縣西南安眾鋪

廣慈寺

在縣西北騎立山

太清觀

在縣西北

清真寺

在東關

及他私堂尼寺不經之祠又百數十區大

抵皆元明舊刹空曠無嘗甚者或爲盜窟益非邑乘所

慮矣

天王堂在城西十三里新岡岡同治六年建

河南巡撫部院李咨據布

按二司會呈蒙札同治六年四月十三日准總理衙門
咨同治六年三月二十三日據法國繙譯官李梅帶同
教士賀安德來署面稱河南天主堂至今未還及教士
穆裕農等被屈各情旋於二十五日復據該繙譯官呈
遞一函內稱賀司鐸今將豫省負屈各情謹呈數款並
照抄買房契約一紙及江海關監督王移領事官巴照
會一件一併錄呈請閱卽飭催該地方官秉公妥速查
辦等情前來本衙門查南陽還堂一案本年正月間准
函稱業已勒限該守務於一月內妥議結案無論是否
仍給江浙會館抑另行擇地給價均須取具該教士收
據存案以資信守各等語迄今久逾一月之限未據聲
覆其置買周宗耀房屋一事案查本衙門前與法國公
使議定法國傳教士如入內地買賣內地田地房屋其
契據內應寫明立交契人某某姓續產賣爲天主堂
公產字據不必專列傳教士及奉教人之名並經行知
上海通商大臣嗣後賣業之人須令未賣之先報明該
處地方官請示應否准其賣給由官酌定不得徑將已
業私行賣給如有私賣者立加懲處等語今查閱抄來
契約內係專列該教士等之名賣主周宗耀亦未曾報
明地方官酌核實與章程不符但該教士價買房屋如

不應買何以並未將原價交還若今價房兩空卽在中
國亦非平允閱前函知已嚴飭該守妥爲調護續歷究
竟如何了結嗣後未據咨報又教士穆裕農被屈一節
上年准來咨復稱據委員查明該教士在鹿邑宿州等
處並無被官紳押解凌侮情事何以至今復來面請又
鄆部兵丁搶掠教中財物一案前准咨稱該教士不知
此事是兵是賊無從追求情願不究此次本衙門亦告
知當時被搶之人固無分於教外教中毋搶之人莫辨
其爲兵爲賊自必無從查辦至該教士原呈稱桐柏南
陽鎮半武安輝縣等處各教案或已經行查未獲或前
未咨報有案是否屬實有無別項情節相應抄錄咨行
分別飭屬切實查明案約辦理完結等因准此卽會
同按察司嚴飭該府縣勸諭紳民務將還堂一案卽日
定地給還取具收據詳咨結案並將鹿邑桐柏鎮平武
安輝縣各教案分飭各州縣詳晰稟覆由司覆核彙詳
以憑咨達等因查此案前蒙憲札准湖廣督部堂官
咨開據法國達領事申陳前事轉飭速辦完結咨復等
因咨院行司當經前升司等會委候補同知直隸州袁
鏡前往查辦旋據該牧會同濟陽府查得該教士所指
舊署官倉鹽滬等處均係官地多有空礙惟汪浙會館

本係該教士原指之所勸諭該會館首事捐讓等情稟
由前升司等會詳轉請分咨一面飭將房屋點交取其
該教士收據去後詎該會館首事因宛郡紳民不願以
致江浙兩省商民均係寄居南陽亦各心懷疑懼不願
捐讓未將會館房屋點交該教士收領嗣於五年八月
有舞陽縣教民劉清波諗知縣民周祥歧與族姪周宗
耀有坐落城內文廟西首公共房宅一所先於是年六
月憑中議價三千八百串賣與邑紳曹學彬等改修書
院至唆周宗耀高擡價值重賣與該教士改爲教堂周
宗耀貪利允從劉清波即邀同教民靳長瑞等作中議
價四千二百串私行重賣與該教士賀安德等爲業立
契成交先交房價二千零二十串周祥歧並不知情經
舉人曹學彬等查知赴縣呈究並據該教士賀安德具
稟請示當經署南陽縣知縣任愷飭差傳案訊得舉人
曹學彬等因南陽東關外舊有崇正書院一座久爲捻
匪焚燬該舉人等於同治五年六月憑中張同霖等議
價三千八百串承買邑民周祥歧周宗耀公共房屋一
處爲改建書院之用卽於初六日立契成交當卽投稅
八月有舞陽縣教民劉清波至唆周宗耀高擡價值重
賣與該教士賀安德等改爲教堂周宗耀貪利允從劉

清波卽邀同教民靳長瑞等作中議價四千二百串私
行重賣與該教士賀安德等爲業卽於是月初三日立
約先交房價二千零二十串周祥歧並不知情質之周
宗燿供認聽從劉清波主謀高擡價值將房屋重賣賀
安德爲業多得錢四百串不諱飭傳劉清波潛逃無迹
檢查五年征收稅契紅簿並無該教士賀安德等報投
前項文契稅銀周宗燿公宅經曹學彬等承買在先該
教士重買在後確鑿可據查律載將已賣與人田宅朦
朧重復典賣者以所得價錢計贓准竊盜論免刺追價
還主田宅從原典買主爲業若重復典賣之人及牙保
知情者與犯人同罪追價入官不知者不坐等語此案
曹學彬等承買周祥歧等公宅實係價買在先應請照
律斷歸曹學彬爲業該教士賀安德等重買周宗燿公
宅是否知情中人劉清波尚未到案無從質訊詳辦應
請先將該教士所交契價二千零二十串勒令周宗燿
如數退繳掣契銷燬劉清波起意主唆重賣周宗燿貪
利允從均各罪有應得應緝獲劉清波質訊明確按律
詳辦取具各結並傳知該教士知照由縣稟奉咨明在
案接奉前因遵覆委據候補知府鄭長華會同署南陽
府知府劉拱宸稟稱卑府等遵卽會同督飭署南陽縣

知縣任愷查得江浙會館地基係道光十二年前憲楊
奏裁縣丞衙署舊址詳奉審部覆准變價賣給商人陳
樹堂等改建會館案據確鑿實與天主教毫無干涉前
府張守等以該教士立意城居恐滋他事稟請議結會
館原係冀息爭端旋因宛郡紳民不願該教士在城設
立教堂物議沸騰以致商民均懷疑懼不願捐讓未將
會館點交該教士收領茲奉委覆查合郡紳士高樹序
等一百四十餘人又復聯名合詞峻拒語多憤激復經
卑府等再三勸導公同核議江浙會館既係兩省商民
購建勢難勒令還堂周宗耀公宅實係紳士曹學彬等
契買在先改建書院亦未便違例斷給他如該教士所
指舊署官倉鹽池均須官地倉廩監獄在在攸關節經
各前府一再稟明蒙咨總理衙門有案均未便給與且
豫省民情素稱剛勁不願該教士在城立堂傳教非獨
宛郡爲然若令雜處城市必不能彼此相安設再別釀
事端更恐有乖和好卑府等再四籌議查有郟城迤西
十二里靳岡地方前於咸豐十一年法國教士安恩理
格來宛會在該處傳教村落清幽地方寬廣聞該教士
有欲在該處修築圩寨旣可建堂復能自衛民教無相
交涉庶幾兩得其平核於同治四年奉通商衙門行文

所載但使所撥之地於民教合宜無論城內城外擬請
卽將蕪岡地方借給准其在彼立堂傳教一切均聽其
便以免轉轉而息訟端似此通融辦理於調停之中仍
與和約無悖至周宗耀公宅遵照逐加查訊實係邑紳
舉人曹學彬等承買在先周宗耀聽從在逃之舞陽縣
教民劉清波王謀貪利多得價錢四百串重買與該教
士賀安德等在後並有稅契確鑿可憑應卽照律將房
斷給曹學彬等爲業查訊周祥岐及該教士賀安德等
並不知情業經該縣勒令周宗耀將所得該教士房價
二千零二十串如數呈繳存庫該教士因未將原契呈
繳未領應請飭令該教士將所立原契呈繳將錢請領
仍一面嚴緝中人劉清波務獲提同周宗耀質訊按律
詳辦又該教士所稱前邸部兵丁搶掠教中財物一案
覆查得前於同治三年十月間賊匪竄近郡城西南新
岡地方該教士在彼傳教其時村民及教士等均各趨
避適僧邸官兵追剿亦由該處經過迨後賊退該處居
民及教中什物多有被搶究竟是兵是賊毫無確證現
在邸部兵丁早經遣散實屬無從查辦所有什物該教
士當時並不檢點攜帶致被搶失亦屬自不小心應毋
庸議所有覆查擬議緣由理合會稟查核詳咨等情本

司等覆查該府等所擬尙屬公允應請如稟辦理又據署鹿邑縣知縣楊惟宗詳稱遵查同治四年八月間前縣鄭令訪有法國教士穆裕農有潛在縣屬馮橋地方聚眾傳教情事當經傳令該教士帶同通事南陽縣人周知經到署公堂接見詢據該教士聲稱自漢口起身由南陽縣入豫於四年五月間來至馮橋傳教攜有領事執照等語鄭令因縣境界聯皖毫風俗竊悍人心浮動且查驗該教士所呈執照內有無論何處設開叛逆不準前往之語惟時皖捻逼近縣境正在戒嚴核與照內章程多有未便隨將該教士留住署內嗣因該教士願回南陽復經鄭令僱備車輛派令妥當丁役護送至淮甯縣轉護前進取有回照並將護送出境緣由通稟在案奉飭前因現復詳加採訪自同城僚屬以至胥役紳民僉稱鄭令邀傳該教士來署本係婉言款留以禮相接該教士因苦爲禮法所拘踟躕不安是以亟求回去亟令派撥兵役護送亦因皖氛逼近地方未靖藉爲沿途照料俾衛起見委無拿辦押解情事明查暗訪衆論僉謂嗣後教士行至裕州境內被匪衝散復投向南陽賒旗鎮寨暫避其時正值匪蹤切近防堵吃緊該門勇等因其服色稍異言語不通又無上沛州縣護送支

票恐係奸細未敢放令入寨亦未稟官以該教士等
株守寨濠並未被匪傷害當經前升司等委員會同該
府縣札調南裕司巡檢周珏貞並釐局委員紳士飭傳
門勇周德勝等到案逐加研訊將該門勇等斥責發落
並將管帶勇員張鼇一併革退以示懲戒由前升司等
核明詳咨在案茲奉前因除再備文關催移覆外理合
將奉查緣由具文詳請查核詳咨等情到司據此本司
等逐一覆查無異除嚴飭南陽府將靳岡地方借給該
教士建堂並將周宗耀呈繳房價錢文如數給該教士
具領將原契銷燬以斷葛藤勒緝劉清波務獲到案提
同周宗耀質訊按律詳辦並飭催鎮平緝縣等處查明
各教案另行詳咨外理合將南陽府還堂及鹿邑南陽
桐柏武安各教案逐一飭查擬議緣由會詳呈請鑒核
俯賜分咨總理衙門暨湖廣總督部堂查照等情據此
查還堂一案先據委員會同南陽府縣具稟到院即經
據情咨達在案茲據該司等彙詳前情除再飭催鎮平
輝縣查覆另詳核咨外應將現詳緣
由咨達同治六年八月咨呈總署

福音教堂在縣東北賒旗店光緒十七年築

新修南陽縣志跋

右南陽縣志十二卷爲圖一爲表二爲志九終以雜記凡三十萬餘言始光緒己亥知縣事濟甯潘侯以縣志失修且二百年舊刻漫漶兼紀南召與今疆域不相應設局重修延邑人張君鳳岡喬君景濂魏君廷鑑任君學椿雷君履棠及侯族人矩健分任纂修鎮平戴君廣恩繪圖體例略依康熙志之舊嘉謀後至亦與焉逾年侯調任正陽京師變起南陽早局中輟與纂諸君星散明年侯復任又得同治中宋教授采輯遺稿於其子燧迺請榮成孫先生總纂事先

生至更定凡例而命嘉謀屬草嘉謀貪多藁不時脫於是更請王君衍續次節孝陽湖費君典稽田賦條例南召李君元勳考中星而李君士驥總讎校每上一編先生丹墨塗乙或至數四以縣少藏書與侯謀籌貲購書鄂滬資考證期以年終蕝事未及期先生以弟喪歸嘉謀丁繼母憂而潘侯調杞去會明年孫先生復遊梁家君督令走謁踵修潘侯自杞給筆札凡再往返書牘備以先生命歸就正前巡撫吉林于公公爲釐正數十事謂金石有專學別請於汝甯守太倉陸公補而正之是時戴圖先成無經緯度綫乃

請王君宗綱測增而潘侯復任梓焉是役也歷六年
前後知縣五任刺取書百十種自始事迄校勘
更二十人糜金錢三千緡有奇方始修時常州楊
欽曾在局一日辭去遺書歷言前人修志事非數年
不成眾迂之至是書藁四易竟如所期諸前任分修
者或遠遊或宦且歸矣于公晚爲監定且刊且改乃
不及見其成而薨爲可惜也書成孫先生旣弁言簡
端嘉謀謹述修書始末附叙於後嗚呼世事方艱乃
第以此區區文字網羅放失誠自知才識庸下蓋其
闕所不知亦多矣當世博雅君子尙其監諸

張嘉謀謹跋

跋

光緒丁酉春守廉奉檄守斯土甫下車閱舊志求治
方漫漶不可卒讀逾二載政稍暇議重修工未半移
攝孟津事遂輟辛丑春再之任續輯之垂成又移攝
杞縣癸卯冬復來銳意竟其事越明年書始成其間
庚子之變亂土匪之肆擾民教之爭鬪守廉之旋來
旋去事屢輟而終成使非孫京卿爲定體例于中丞
爲校訛舛張魏任戴諸君子爲搜採而纂輯之謫陋
如守廉顧能任考訂耶然閱時六載守廉三至乃得
告成一志之難已若此則夫欲爲民興利除害其難

易又何如也甲辰冬十一月知縣事濟甯潘守廉識